


Joyce Meyer

Shërim për
Zemrat e Thyera



Përjeto Ripërtëritje
Përmes
Fjalës së Perëndisë

SHËRIM PËR
ZEMRAT E THYERA

SHËRIM PËR ZEMRAT E THYERA

*Përfjeto Ripërtëritje Përmes Fuqisë
së Fjalës së Perëndisë*

JOYCE
MEYER



Tiranë

Citimet biblike janë marrë nga Bibla, Versioni ABS. E drejta autorit © 2002 nga Albanian Bible Society. Të gjitha të drejtat janë të rezervuara. Përdorur me leje.

Komentet shpjeguese dhe sinonimike në kllapa përgjatë citimeve biblike janë marrë nga *The Amplified Bible*, copyright ©1987 nga The Lockman Foundation. Përdorur me leje.

Në raste të tjera të përdorimit të citimeve biblike nga ku materiali është përkthyer, informacioni jepet menjëherë pas përdorimit të tyre sipas versioneve të mëposhtëm:

The Living Bible (TLB) ©1971 nga Tyndale House Publishers, Inc., Wheaton, Illinois 60189.

Botim i Joyce Meyer Ministries

© 1997 nga Joyce Meyer

P.O.Box 655

Fenton, Missouri 63026

Të gjitha të drejtat e rezervuara. Përveç rasteve të lejuara në ligjin mbi të drejtat e autorit, asnjë pjesë e këtij publikimi nuk mund të riprodhohet, të shpërndahet, apo të transmetohet në asnjë formë apo mjet, apo të ruhet në një bazë të dhënash ose sistem rikthimi kompjuterik, pa pasur më parë miratimin e shkruar të publikuesit.

Përkthyen dhe Redaktuan: Elvira dhe Skerdi Hoxha

Layout: Gjergji Kollumbi

Shtypur në Shtëpinë botuese “AGStudio.al”

Emri dhe logoja e Joyce Meyer Ministries janë shenja dalluese me të drejta ekskluzive të kësaj shërbese.

PËRMBAJTJA



Hyrje: Fjala e Perëndisë	1
1 Të Përjetosh Dashurinë e Perëndisë	7
2 Të Kesh Siguri Për Të Ardhmen Tënde	19
3 Të Njohësh Drejtësinë Tënde në Krishtin	31
4 Kapërcimi i Frikës në Jetën Tënde	45
Përfundim: Qëndro i Patundur	57
Shpallje Biblike	59
Hyrje: Fjala e Perëndisë	59
Dashuria e Perëndisë	61
E Ardhmja Jote	66
Drejtësia Jote në Krishtin	71
Kapërcimi i Frikës	76
Qëndroj i Patundur	82

SHËRIM PËR
ZEMRAT E THYERA

HYRJE: FJALA E PERËNDISË



♥ *Ai dërgoi fjalën e tij dhe i shëroi, i shpëtoi nga gropa.*

PSALMI 107:20

*F*jala e Perëndisë na shëron dhe na shpëton. Ajo gjithashtu na ndryshon si ne, ashtu edhe jetët tona.

Fjala e Perëndisë do të të ndryshojë ty.

Tek Psalmi 1:1-3, Davidi shkroi se njeriu që mediton mbi Fjalën e Perëndisë ditë dhe natë do të bëhet i palëkundur si një pemë me rrënjë të thella dhe se çdo gjë që do të bëjë, do të ketë mbarësi.

Të jesh i palëkundur do të thotë të jesh i qëndrueshëm. Ti mund të jesh i qëndrueshëm dhe çdo gjë që do të bësh, do të ketë mbarësi. Mënyra për ta arritur këtë është duke medituuar mbi Fjalën e Perëndisë.

Të meditosh mbi Fjalën do të thotë që ta sjellësh e rrotullosh atë vazhdimisht nëpër mendje, ta mendosh e ta përsiatësh Fjalën, si dhe t'ia pëshpëritësh vetes, ashtu siç e urdhëroi Zoti shërbëtorin e Tij, Jozueun:

♥ Ky libër i ligjit mos u ndaftë kurrë nga goja jote, por mendohu për të ditë e natë, duke kërkuar të veprosh sipas të gjitha atyre që janë shkruar, sepse atëherë do të kesh sukses në veprimet e tua, atëherë do të përparosh.

JOZUEU 1:8

Tek Ligji i Përtërirë 30:14, na thuhet: ♥ *“Por fjala është shumë afër teje; është në gojën tënde dhe në zemrën tënde, që ti ta zbatosh.”*

Tek Isaia 55:11, Zoti na premtun: ♥ *“Kështu do të jetë fjala ime, që del nga goja ime; ajo nuk do të më kthehet bosh [pa dhënë asnjë efekt, e padobishme], pa kryer atë që dëshiroj dhe pa realizuar plotësisht atë për të cilën e dërgova.”*

Tek 2 Korintasve 3:18, apostulli Pal na mëson se ndërsa ne vështrojmë lavdinë e Zotit, në Fjalën e Tij, ne transformohemi ose ndryshohemi. Një pjesë e të vështruarit të Zotit është që ta shohësh planin e lavdishëm që Ai ka për ne dhe ta besosh atë.

Perëndia na do dhe Ai ka një plan të mirë, një plan të lavdishëm, për jetët tona. Në kapitullin e parë të Letrës Drejtuar Efesianëve, Pali thotë se Perëndia e përpiloi të gjithë planin e shpëtimit nëpërmjet Krishtit me qëllim që të përmbushte dashurinë e thellë që Ai ndjen për ne.

Kjo do të thotë se Perëndia të do ty dhe se Ai ka një plan të mrekullueshëm e të lavdishëm për ty dhe për jetën tënde. Ti duhet ta besosh dhe ta shpallësh këtë gjë.

Djali është përpjekur ta shkatërrojë planin e Perëndisë. Ai është munduar që gjatë gjithë jetës tënde të të bëjë të ndjehesh i pavlerë. Pse? Sepse ai nuk do që ti të besosh ndonjëherë se je i dashur shumë fort nga Perëndia. Satani e di se po ta dëgjosh vazhdimisht Fjalën e Perëndisë dhe po ta lejosh atë që të bëhet pjesë e jetës tënde të brendshme, pjesë e sistemit tënd të menduarit, tek ty do të ndodhë një ndryshim. Dhe ai nuk do që të ndodhë kjo gjë.

Kjo është arsyeja pse e kam shkruar këtë libër. Në të gjenden Shkrime që unë besoj se do të ndryshojnë imazhin që ti ke për veten, duke ndryshuar kështu edhe të tashmen edhe të ardhmen tënde.

Në Bibël thuhet se ti je krijuar sipas shëmbëlltyrës së Perëndisë. (Zanafilla 1:27) Të besosh atë që thotë

Perëndia për ty e ndryshon qëndrimin dhe mendimin që ti ke për veten. Pyete veten: “Çfarë mendoj unë për veten?” Pastaj pyete veten: “Çfarë mendon Perëndia për mua?”

Ajo që Perëndia mendon dhe thotë për ty gjendet në Fjalën e Tij. Shpalljet e Shkrimit që gjenden në këtë libër do të të sjellin në pajtim me Perëndinë dhe jo me armikun. Ndoshta djalli të ka gënjyer gjithë jetën dhe ti i ke besuar. Tani ka ardhur koha që t'i besosh Perëndisë.

Tek Gjoni 17:17, Jezusi tha se Fjala e Perëndisë është E Vërteta dhe tek Gjoni 8:32 Ai tha se është E Vërteta ajo që do të na çlirojë. Fjala e Perëndisë, Fjala e Së Vërtetës jo vetëm që do të na çlirojë, por ajo do të ndryshojë edhe vetë pamjen tonë të jashtme, si dhe natyrën tonë. Ja pse ti duhet ta lexosh, ta studiosh dhe të meditosh mbi të duke e lejuar që të zbresë thellë brenda qenies tënde.

Tek Krishti ti mund të jesh i sigurt, i mbushur plot me gëzim, një ngadhënjimtar, besnik, një mik i Perëndisë, një njeri që kërkon fytyrën e Perëndisë.¹

Shpalle për veten atë që Perëndia thotë për ty në Fjalën e Tij. Ndërsa e bën këtë gjë, Perëndia do të fillojë që të veprojë në jetën tënde. Ai do të të ndryshojë dhe

1. Bazuar në këngën “Do të ta Ndryshoj Emrin” (I Will Change Your Name), teksti dhe muzika nga B. J. Butler © Mercy Publishing. Përdorur me leje.

do të të kthejë nga një njeri zemërthyer, të lënduar, dhe të frikësuar, në mikun e Tij besnik të cilin Ai e do dhe i cili e do shumë Atë.

Tek Isaia 61:1-3, lexojmë:

♥ Fryma e Zotit, Zoti, është mbi mua, sepse Zoti më ka vajosur për t'u dhënë një lajm të mirë të përlulurve; më ka dërguar të lidh plagën e atyre që e kanë zemrën të thyer, t'u shpall çlirimin [fizik dhe frymëror] atyre në robëri, hapjen e burgut të burgosurve, të shpall vitin e hirit të Zotit [vitin e favorit të Tij] dhe ditën e hakmarrjes së Perëndisë tonë, për të ngushëlluar tërë ata që pikëllohen, për t'u dhënë gëzim [dhe ngushëllim] atyre që pikëllohen në Sion, për t'u dhënë atyre një diademë në vend të hirit, vajin e gëzimit në vend të zisë, mantelin e lavdërimit në vend të një fryme të ligështuar, me qëllim që të quhen lisa të drejtësisë [kryelartë, të fuqishëm dhe madhështorë, të dalluar për drejtësinë e tyre dhe për qëndrimin e duhur ndaj Perëndisë], mbjellja e Zotit, për të paraqitur lavdinë e tij.

Po, Perëndia po të ndryshon. Ai po ndryshon karakterin tënd. Ai po ndryshon jetën tënde. Perëndia

të do. Ti je një person i veçantë. Armiku nuk do që ti të ndjehesh i dashur apo e dashur. Por Perëndia e dëshiron këtë gjë për ty.

Në faqet e mëtejshme do të mësosh që jo vetëm të jesh i sigurt për dashurinë e Perëndisë, por edhe si të jesh i sigurt për të ardhmen tënde, si ta njohësh drejtësinë tënde (kush je ti në Krishtin) dhe si ta mposhtësh frikën që mund të të grabisë të gjitha bekimet që Perëndia dëshiron të derdhë mbi ty si pjesë e jetës së mrekullueshme që Ai ka planifikuar për ty.

Perëndia të bekoftë teksa mëson ta thuash hapur Fjalën e Tij e cila nuk do të kthehet bosh tek Ai, por do ta përmbushë vullnetin dhe qëllimin e Tij në jetën tënde!

1



TË PËRJETOSH DASHURINË E PERËNDISË

♥ Por në të gjitha këto jemi më shumë se fitimtarë me anë të atij që na deshi.

Sepse jam i bindur [jam i sigurt] se as vdekja, as jeta, as engjëjt, as pushtetet, as fuqia dhe as gjërat e tashme, as gjërat e ardhshme,

as lartësitë, as thellësitë, as ndonjë tjetër krijesë, nuk do të mund të na ndajë nga dashuria e Perëndisë që është në Jezu Krishtin, Zotin tonë.

ROMAKËVE 8:37-39

Në këtë fragment, apostulli Pal na siguron se pavarësisht asaj që mund të jetë kundër nesh në këtë jetë, fitorja e plotë është e jona nëpërmjet Jezus Krishtit që na deshi aq fort sa dha jetën e Tij për ne.

Tek Gjoni 3:16 vetë Jezusi thotë: ♥ *“Sepse Perëndia e deshi aq botën, sa (madje) dha Birin e tij (unik) të vetëmlindurin, që, kushdo që beson në të (mbështetet tek Ai, mbahet pas Tij, varet tek Ai), të mos humbasë (të mos shkatërrohet, të mos zhduket), por të ketë jetën e përjetshme (që zgjat përjetë).”*

Jezusi të do ty, të do personalisht, aq shumë sa do të jepte jetën e Tij për ty edhe sikur ti të ishe i vetmi njeri mbi tokë.

Gjoni, dishepulli i dashur na thotë: ♥ *“Në dashuri nuk ka frikë [nuk ke pse të trembesh], madje dashuria e përsosur (e plotë, e maturuar) e nxjerr jashtë frikën, sepse frika ka të bëjë me ndëshkimin dhe [kështu] ai, që ka frikë nuk është i përsosur në dashurinë [nuk është i rritur në maturinë e plotë të dashurisë].”* (1 E GJONIT 4:18).

Kur kemi frikë në zemër, kjo është një shenjë që tregon se kemi akoma mungesë njohurie se sa shumë na do Perëndia.

Sikur ta dije shtrirjen depërtuese të dashurisë së Perëndisë, të gjitha frikërat e tua do të largoheshin tutje.

Tek Gjoni 16:27, Jezusi thotë: ♥ *“Vetë Ati ju do [me ndjenjë], sepse ju më deshët mua dhe keni besuar se unë dola nga Perëndia.”*

A e ke të vështirë që ta besosh se Perëndia përkujdeset kaq shumë për ty?

Për shumë vjet e kam pasur të pamundur ta pranoja dashurinë e Perëndisë në jetën time sepse mendoja që nuk isha e denjë për dashurinë e Tij. Por tani e di që Ai më do mua edhe pse akoma vazhdoj të jem e papërsosur.

Tek Gjoni 14:21, Jezusi na kujton: ♥ *“Kush ka urdhërimet e mia dhe i mban, është ai që më do [vërtet]; dhe kush më do mua [vërtet], Ati im do ta dojë; dhe unë [gjithashtu] do ta dua dhe do t'i shfaqem atij (do t'i zbulohem, do t'i bëhem i dukshëm) [do të lejoj që të shihem qartë prej tij dhe do të bëhem i vërtetë për të.]”*

Jezusi dëshiron që të bëhet i vërtetë në jetën tënde.

Bindja është fryt i dashurisë së vërtetë, por asnjëherë nuk do të mund ta duash Perëndinë aq fort sa t'i bindesh Atij pa e pranuar së pari dashurinë e Tij për ty. Nuk mundesh që ta meritosh atë dashuri. Nuk mund ta blesh me vepra të mira, apo ta përfitosh me sjellje të mira.

Dashuria e Perëndisë është një dhuratë që të jepet

falas; është e pakushtëzuar. Ajo vjen tek ne nëpërmjet sakrificës që Jezusi bëri kur Ai vdiq për ne në kryq.

Pranoje këtë dashuri prej Perëndisë tani. Ulu në praninë e Tij dhe thuaj: “Unë besoj se Ti më do mua, o Zot, dhe e pranoj dashurinë tënde.”

Tek 1 e Gjonit 4:19, ne lexojmë: ♥ *“Ne e duam atë, sepse ai na deshi i pari.”* Ndoshta ke qenë duke e bërë mbrapsht ose “përmbys” këtë gjë, siç kam bërë dhe unë për shumë vjet. Ndoshta po përpiqesh ta duash Perëndinë mjaftueshëm dhe të bësh shumë gjëra që Ai të ta kthejë mbrapsht këtë dashuri. Por shikoni përsëri vargun tek 1 e Gjonit 4:19: ♥ *“Ne e duam atë, sepse ai na deshi i pari.”*

Davidi ishte plot me besim te dashuria e Perëndisë kur tha tek Psalmi 36:7: ♥ *“O Perëndi, sa e çmuar është mirësia jote! Prandaj bijtë e njerëzve gjejnë strehë nën hijen e krahëve të tu.”*

Do të doja të ndaja me ty disa fragmente nga Psalmi 139. Davidi kishte një mënyrë të veçantë për të komunikuar me Perëndinë, dhe ne do bënim mirë të ndiqnim shembullin e tij. Shpall me gojën tënde fjalët e këtij psalmi:

♥ Ti më ke hetuar, o ZOT, dhe më njeh [tërësisht].
Ti e di kur ulem dhe kur ngrihem, ti e kupton nga larg mendimin tim. Ti e shqyrton me kujdes ecjen time dhe pushimin tim. Kurdoherë e di ku jam. Sepse, edhe para se të jetë fjala mbi gojën time ti, o Zot, e di atë plotësisht. Ti më rrethon nga pas dhe përpara dhe vë dorën tënde [të bekimit] mbi mua.

Njohja jote është shumë e mrekullueshme për mua, aq e lartë sa nuk mund ta arrij. Ku do të mund të shkoja larg Frymës sate, ose ku do të mund të ikja larg pranisë sate?

Oh, sa të çmuara janë për mua mendimet e tua, o Perëndi! Sa i madh është gjithë numri i tyre! Po të doja t'i numëroja, do të ishin më të shumtë se rëra; kur zgjohem, jam ende me ty.

PSALMI 139:1-7, 17,18

Kjo është e fuqishme!

Profeti Isaia na thotë se Perëndia është duke na pritur që të tregojë mirësinë e Tij ndaj nesh:

♥ *“Prandaj Zoti [me këmbëngulje] do të presë [me shpresë*

dhe me mall] për t'ju dhënë hir, pastaj ai do të lartësohet, sepse pati mëshirë për ju, sepse Zoti është një Perëndi i drejtësisë. Lum (janë të bekuar, plot fat, për t'u marrë shembull) të gjithë ata që [me këmbëngulje] kanë shpresë tek ai [për fitoren e Tij, për favorin e Tij, dashurinë e Tij, paqen e Tij, gëzimin e Tij dhe për miqësinë e Tij të pakrahasueshme e të pathyeshme]!

(ISAIA 30:18)

Mendoni pak për këtë, Perëndia dëshiron që të kalojë kohë me ty, sepse Ai të do dhe sepse ti je i veçantë për Të.

Perëndia të do aq shumë sa i numëron dhe i regjistron hapat e ecejakeve të tua. Ai i mbledh lotët e tu dhe i vë në një shishe dhe i shkruan ato në librin e Tij. (Psalmi 56:8)

Tek Gjoni 14:18, Jezusi iu tha dishepujve: ♥ “Nuk do t’ju lë bonjakë [të pangushëlluar, të braktisur, në zi, të mjerë, pa përkrahje], do të kthehem te ju.”

Tek Psalmi 27:10, Davidi shkroi: ♥ “Edhe sikur babai im dhe nëna ime të më braktisin, Zoti do të më pranonte [do të më birësonte si fëmijën e Tij].”

Ndoshta ty po të mungon dashuria natyrore që çdo person dëshiron dhe kërkon; ndoshta edhe vetë familja jote të ka braktisur. Perëndia do që ti ta dish sot se dashuria e Tij për ty është kaq e fortë, kaq e madhërishtme dhe

e fuqishme sa do të kompensojë humbjen e dashurisë së kujt do tjetër. Lejoje Atë të të ngushëllojë dhe të ta shërojë zemrën e lënduar. Ti je birësuar në familjen e Perëndisë. Ti je fëmija i Tij dhe Ai të do.

Tek Letra Drejtuar Efesianëve 3:17-19, apostulli Pal lutet për mua dhe për ty:

♥ “...që Krishti të banojë (të qëndrojë, të rrijë, ta bëjë shtëpinë e tij të përhershme) në zemrat tuaja (tani) me anë të besimit, dhe ju të jeni të rrënjësuar dhe të themeluar në dashuri,

që të jeni në gjendje të kuptoni me të gjithë shenjtorët [njerëzit e përkushtuar të Perëndisë, përjetimin e asaj dashurie] se cila është gjerësia, gjatësia, thellësia dhe lartësia,

dhe ta njihni dashurinë e Krishtit që tejkalon çdo njohuri [pa përjetim], që [në të gjithë qenien tuaj] të mbusheni në gjithë plotësinë e Perëndisë [pastë masën më të madhe të Pranisë hyjnore dhe të bëhet një trup krejtësisht i mbushur dhe i përmbytur me Vetë Perëndinë].

Po, Perëndia të do dhe po të vëzhgon. Ai të mbikëqyr gjatë gjithë kohës. Isaia 49:16 thotë se Ai të ka para syve dhe të ka gdhendur në pëllëmbët e duarve të Tij.

Tek Gjoni 15:9 (TLB), Jezusi thotë: ♥ *“Ashtu siç më ka dashur mua Ati, ashtu edhe unë ju kam dashur juve; jetoni brenda dashurisë time.*

Sa shumë të do Perëndia?

♥ *“Askush s’ka dashuri më të madhe se kjo [askush nuk ka treguar një ndjenjë kaq të madhe], që dikush të japë [ta dorëzojë] jetën e vet për miqtë e tij” (GJONI 15:13).*

Askush nuk ka dashuri më të madhe për ty se kaq.

Jezusi dëshiron që të jetë miku yt. Ai e dha jetën e Tij për të të treguar se sa shumë të do ty. Tek Romakëve 5:6, Pali na kujton: ♥ *Sepse, ndërsa ishim ende të dobët [të pafuqishëm për të shpëtuar veten tonë], Krishti vdiq në kohën e tij për të pabesët (në vend të të pabesëve).*

Tamam në kohën e duhur, Perëndia e shfaqti dashurinë e Tij duke dërguar Krishtin për të vdekur për ne, ndërkohë që ne ishim akoma mëkatarë.

Më pas në vargun 7, Pali vazhdon duke thënë:

♥ *“Vështirë, në fakt, se vdes dikush për një të drejtë; mbase ndonjë do të guxonte të vdiste për një njeri të mirë.”*

Dhe Pali përfundon me vargun 8: ♥ *“Por Perëndia e tregon dashurinë e tij ndaj nesh në atë që, kur ende ishim mëkatarë, Krishti vdiq për ne.”*

Oh, miku im, Perëndia të do kaq shumë. Fryma e Shenjtë po mundohet të zbulojë dashurinë e Perëndisë për ty. Hape zemrën tënde dhe pranoje dashurinë e Perëndisë. Ai të pranon ty kudo që të jesh. Ai asnjëherë nuk të refuzon dhe kurrë nuk të ndëshkon. (Gjoni 3:18)

Tek Letra Drejtuar Efesianëve 1:6 (KJV), Pali shkruan se ne jemi pranuar nëpërmjet Birit të dashur, Zotit Jezus Krisht. Aftësia jonë për të qenë të përsosur nuk na bën të pranueshëm për Perëndinë. Vetëm nëpërmjet Krishtit kemi mundësi të bëhemi mjaftueshëm të drejtë për të ardhur te Ati.

♥ *“në të cilin kemi shpengimin”,* thotë Bibla tek Letra Drejtuar Efesianëve 1:7, *“me anë të gjakut të tij, faljen e mëkateve sipas pasurisë së hirit të tij”*

Dhe tek Isaia 54:10, na është thënë:

♥ *“Edhe sikur malet të zhvendoseshin dhe kodrat të luanin nga vendi, dashuria ime nuk do të largohet prej teje, as besëlidhja e paqes nuk do të hiqet, thotë Zoti, që ka dhembshuri për ty”.*

Tek 1 Korintasve 1:9, Pali na kujton se: ♥ *“Besnik është Perëndia, nga i cili u thirrët në bashkësinë e Birit të tij Jezu*

Krishtit, Zotit tonë.....” Ai ka premtuar që asnjëherë nuk do të të refuzojë për sa kohë që ti do të besosh te Krishti, Ai gjithashtu ka premtuar se do të të dojë dhe do t’i mbajë premtimet e Tij.

Tek Gjoni 17:9,10, vetë Jezusi thotë që po lutet për ty sepse ti i përket Atij. Ti i ishe dhënë Atij prej Zotit, dhe Ai është lavdëruar në ty.

Perëndia të do. Pranoje dashurinë e Tij.

Shpall bashkë me Davidin fjalët e psalmit:

♥ “Beko (lavdëro me ndjenjë dhe me hijeshi), shpirti im, Zotin dhe gjithçka që është në mua të bekojë emrin e tij të shenjtë.

Beko (lavdëro me ndjenjë dhe me hijeshi), shpirti im, Zotin dhe mos harro asnjë nga të mirat e tij.

Ai fal të gjitha paudhësitë e tua [secilën prej tyre] dhe shëron të gjitha sëmundjet e tua, shpengon jetën tënde nga shkatërrimi dhe të kurorëzon me mirësi e dhembshuri;

PSALMI 103:1-4

Në përkthimin e Biblës të quajtur “Bibla e Gjallë” (TLB) në vargjet 5,6,8,11-13,17, Davidi thotë për Zotin:

♥ “ai e mbush jetën time me të mira dhe më bën të ri si shqiponja. Zoti iu jep të drejtën të gjithë atyre që janë të shtypur.

Ai është i mëshirshëm dhe zemërbutë edhe ndaj atyre që nuk e meritojnë, i ngadalshëm në zemërim dhe i madh në mirësi. Ai nuk mban mëri dhe as nuk qëndron i zemëruar përjetë... Mirësia e Perëndisë ndaj atyre që kanë frikë prej tij është aq e madhe sa janë të lartë qiejt mbi tokën. Ai i ka larguar nga ne fajet tona sa largësia mes lindjes dhe perëndimit. Ai është si një baba për ne, i butë dhe i dhembshur është Zoti me ata që e respektojnë Atë.

... mirësia e mbushur plot dashuri e Zotit vazhdon nga përjetësia në përjetësi...”

Sërish, Davidi na thotë në Psalmin 32:10 ♥ “Por ai që ka besim tek Zoti do të rrethohet nga mirësia e tij” dhe në Psalmin 34:1-8 ai shkruan:

♥ “Unë do ta bekoj Zotin në çdo kohë; lëvdimi i tij

do të jetë gjithnjë në gojën time. Shpirti im do të krenohet me Zotin; njerëzit e përlulur do ta dëgjojnë dhe do të gëzohen. Madhështojeni Zotin bashkë me mua dhe të lartësojmë bashkë emrin e tij.

Unë e kërkova Zotin, dhe ai m'u përgjigj dhe më çliroi nga të gjitha tmerret e mia. Ata e shikuan atë dhe u ndriçuan, dhe fytyrat e tyre nuk u turpëruan. Ky i pikëlluar klithi dhe Zoti e dëgjoji, e shpëtoi nga të gjitha fatkeqësitë e tij. Engjëlli i Zotit zë vend rreth atyre që kanë frikë prej tij dhe i çliron.

Provojeni dhe shihni sa i mirë është Zoti; lum ai njeri që gjen strehë tek ai.

Pjetri na tregon ne se dashuria mbulon një shumicë mëkatesh. (1 e Pjetrit 4:8) Dashuria e Perëndisë është duke të të rrethuar. Jeto i mbuluar nën këtë dashuri. Lëre të ta bekojë ditën. Përsërit me gojën tënde shpesh gjatë ditës: “Perëndia më do mua.”

Medito mbi Shkrimet në këtë kapitull. Kjo përlësi nga ana jote do të të ndihmojë që të pranosh nga Zoti atë që Ai dëshiron të të japë – sigurinë e begatisë dhe qëndrueshmërinë e dashurisë së Tij.

2



TË KESH SIGURI PËR TË ARDHMEN TËNDE

*D*o të doja të ndaja me ty disa Shkrime mbi të ardhmen e mrekullueshme që Perëndia ka planifikuar. Dua që ta dish se sa vlerë ke dhe se Perëndia ka pasur një qëllim të veçantë kur të krijoi ty.

Në një këngë që titullohet: “E kam një Fat” (I Have a Destiny) kompozitori thotë se ai ka një fat ose një destinacion të cilin ai e di se do ta përmbushë, një destinacion që ishte përgatitur për të prej Perëndisë I Cili e zgjodhi dhe se Perëndia po punon fuqishëm nëpërmjet tij me anë të fuqisë së Frymës. Kënga përfundon me një deklaratë emocionuese: “Unë kam një fat dhe nuk është një dëshirë boshe sepse e di se kam lindur për një kohë të tillë, për një kohë të tillë si kjo.”¹

1. © 1993 People Of Destiny (Administruar nga WORD Music).

Të gjitha të drejtat janë të rezervuara. Materiali është përdorur me leje.

Po ti? Si e parashikon të ardhmen tënde?

Perëndia dëshiron që ti të jesh plot me shpresë dhe djalli dëshiron që ti të jesh i pashpresë. Perëndia dëshiron që ti të presësh gjëra të mira në jetën tënde çdo ditë. Djalli gjithashtu dëshiron që ti të presësh për gjëra, por ato të jenë fatkeqësi dhe rrënim.

Shkruesi i Fjalëve të Urta 15:15 thotë: ♥ *“Të gjitha ditët e të varfrit janë të këqija [nga mendimet e ankthshme dhe parandjenjat], por për një zemër të kënaqur ka festë përherë [pavarësisht nga rrethanat].”*

Parandjenjat e këqija thjesht janë duke pritur që gjërat e këqija të ndodhin para se ato të ndodhin vërtet. Ky Shkrim thotë qartësisht se nëpërmjet këtyre parandjenjave të këqija, ditët tona përfundojnë të mbushura me vuajtje.

Tek Psalmi 27:13, Davidi shkruan: ♥ *“[Si do të kisha përfunduar] po të mos isha i sigurt se do të shoh mirësinë e Zotit në dheun e të gjallëve!”* Në vargun tjetër, ai na nxit: *“Prit me ngulm Zotin; ji i fortë, ki zemër; pra, prit me ngulm Zotin.”*

Tek Jeremia 29:11 Zoti zbulon qëllimet që Ai ka kundrejt nesh: ♥ *“Sepse unë i njoh mendimet që kam për ju, thotë Zoti, mendime paqeje dhe jo të së keqes, për t’ju dhënë një të ardhme dhe një shpresë.”*

Kujto, djalli do që ti të jesh pa shpresë. Ai do që të dukesh pa shpresë, të mendosh pa shpresë, të flasësh pa shpresë dhe të veprosch pa shpresë.

Por dëgjo këto fjalë të fuqishme të shkruara nga Davidi tek Psalmi 42:11: ♥ *“Pse ligështohesh, shpirti im, pse rënkon përbrenda meje? Shpreso te Perëndia, sepse unë do ta kremtoj ende; ai është shpëtimi im dhe Perëndia im.”*

Po t'i fshehësh të tilla vargje në zemër do kesh me vete ndihmë për të qenë plot shpresë dhe pritshmëri të mbushura me gëzim. Do të dukesh plot shpresë, do të mendosh plot shpresë, do të flasësh plot shpresë dhe do të veprosch plot shpresë.

Tek Romakëve 5:5 thuhet: ♥ *“Por shpresa nuk turpëron, sepse dashuria e Perëndisë është derdhur në zemrat tona me anë të Frymës së Shenjtë që na është dhënë.”*

Me fjalë të tjera, ne e dimë se Perëndia na do sepse kështu na mëson Fryma e Shenjtë. Ne e vendosim shpresën tonë tek Perëndia sepse jemi të sigurt se Ai na do dhe ka planifikuar një të ardhme madhështore për ne. Dhe kur shpresa dhe pritshmëritë tona janë tek Ai, nuk përfundojmë kurrë të zhgënjyer, të mashtruar apo të turpëruar.

Tek Psalmi 84:11 (KJV), lexojmë: ♥ *“Sepse Zoti Perëndi është diell dhe mburojë; Zoti do të japë hir dhe lavdi; ai nuk u refuzon asnjë të mirë atyre që ecin drejt.”*

Tek Filipianëve 1:6, Pali na siguron: ♥ *“Duke qenë i bindur për këtë, se ai që nisi një vepër të mirë në ju, do ta vazhdojë deri në ditën e Jezu Krishtit [deri në kohën e kthimit të Tij] duke e zhvilluar [atë vepër të mirë] dhe duke e çuar në përfundim të plotë brenda jush.”*

Tek Efesianëve 2:10, Pali shpjegon arsyen për sigurimin e tij madhështor:

♥ Sepse jemi vepra e tij [bërë nga dora e Perëndisë], e krijuar në Krishtin Jezus [të rilindur] për vepra të mira që Perëndia përgatiti që më parë (i paraplanifikoi), që ne [duke ecur në shtigje që Ai i bëri gati që më parë] të ecim në to [duke jetuar jetën e mirë që Ai rregulloi që më parë dhe e bëri gati për ne].

Tani mund të jesh duke pyetur veten: “Në qoftë se Perëndia ka një plan kaq të mirë për mua, kur do ta gjej atë?”

Përgjigjja është shkruar tek Libri i Predikuesit 3:17: *“... sepse ka një kohë të caktuar për çdo gjë dhe për çdo vepër.”*

Perëndia do ta realizojë planin dhe qëllimin e Tij për ty në kohën që Ai ka caktuar. Pjesa jote është që thjesht të bësh ashtu siç sugjeron Pjetri, që do të thotë ta përlësh veten nën dorën e fuqishme të Perëndisë që

në kohën e duhur Ai të të lartësojë. (1 e Pjetrit 5:6)

Tek Habakuku 2:2, Zoti i dha profetit të Tij një vizion për planin që kishte për të ardhmen, duke e urdhëruar që ai ta shkruante në mënyrë që të tjerët ta lexonin. Por në vargun tjetër Ai vazhdon duke thënë: ♥ *“Sepse vegimi është për një kohë të caktuar, por në fund ai do të flasë dhe nuk do të gënjejë; nëse vonon, prite, sepse me siguri do të vijë dhe nuk do të vonojë.”* (HABAKUKU 2:3).

Shkrimtari i Letrës Drejtuar Hebrenjve 6:18,19 na thotë se këto gjëra u shkruan me qëllim që ♥ *“...të kemi ngushëllim të fortë ne, që kemi marrë strehë duke u kapur nga shpresa që na u vu përpara. Kjo shpresë që ne kemi është si një spirancë e sigurt dhe e patundur për shpirtin, e cila hyn deri në brendësinë e velit.”*

Dhe Pali thotë që: ♥ *“...të gjitha gjërat bashkëveprojnë për të mirë për ata që e duan Perëndinë, për ata që janë të thirrur sipas qëllimit të tij”* (ROMAKËVE 8:28).

Më pas, tek letra e tij për kishën në Efes, Pali na kujton se ne kemi një qëllim, duke na thënë: ♥ *“(ai) ... që, sipas (si pasojë e) fuqisë që vepron në ne, mund të bëjë (dhe mund ta kryejë qëllimin e Tij) jashtë mase më tepër nga sa [ne guxojmë të] kërkojmë ose mendojmë [pafundësisht përtej lutjeve, dëshirave, mendimeve, shpresave ose ëndrrave tona më të larta].”* (EFESIANËVE 3:20)

Perëndia do që të jesh i mbushur me shpresë sepse ai është gati që të bëjë gjëra edhe më të mëdha sesa mund të shpresosh. Megjithatë, në qoftë se je i pashpresë – ashtu siç do djalli që të jesh – atëherë nuk po bën pjesën që Perëndia të ka kërkuar të bësh, e cila është: t'i vendosësh shpresat dhe pritshmëritë tek Ai, duke besuar se Ai ka një plan të mirë për jetën tënde dhe duke besuar se plani është në procesin e realizimit.

Tek Efesianëve 1:11, Pali thotë për Zotin Jezus Krisht: ♥ *“në të cilin edhe u zgjodhëm për trashëgimi (u bëmë pjesa e Perëndisë), duke qenë të paracaktuar (të zgjedhur dhe të caktuar që më parë) sipas vendimit të atij që vepron gjithçka sipas këshillës së vullnetit të tij.”*

Kujto urdhërimin e Perëndisë për shërbëtorin e Tij tek Jozueu 1:8 ♥ *“Ky libër i ligjit mos u ndaftë kurrë nga goja jote, por mendohu për të ditë e natë, duke kërkuar të veprosh sipas të gjitha atyre që janë shkruar, sepse atëherë do të kesh sukses në veprimet e tua, atëherë do të përparosh.”*

Kujto gjithashtu edhe Ligjin e Përtërirë 30:14, ku thuhet: ♥ *“Por fjala është shumë afër teje; është në gojën tënde dhe në zemrën tënde, që ti ta zbatosh.”*

Tek Isaia 55:11, Zoti na tregon se si shpallja e Fjalës së Tij do të ndihmojë për realizimin e qëllimeve të Tij në jetën tonë: ♥ *“Kështu do të jetë fjala ime, që del nga goja*

ime; ajo nuk do të më kthehet bosh, pa kryer atë që dëshiroj dhe pa realizuar plotësisht atë për të cilën e dërgova.”

Jepja gojën tënde Perëndisë, lëre që ajo të jetë goja e Tij. Fillo të flasësh Fjalën e Tij, sepse Ai ka një të ardhme të mirë, një qëllim të mirë dhe një plan të mirë për ty. Flit në pajtim me Perëndinë dhe jo me armikun tënd.

Kujto, secili prej nesh ka një fat hyjnor.

Si mendon se do të jesh në të ardhmen? Djalli do që të mendosh se po përkeqësohesh dhe nuk po përmirësohesh. Ai do që të mendosh se sa larg do të të duhet të shkosh, dhe jo se sa shumë rrugë ke bërë deri tani.

A irritohesh me veten, duke u ndjerë sikur nuk do të ndryshosh asnjëherë? Ki shpresë, Perëndia po të ndryshon gjatë gjithë kohës. Fjala e Tij po vepron fuqishëm brenda teje.

Ligji i Përtërirë 7:22 na kujton se Ai na ndihmon për t'i mposhtur armiqtë tanë pak nga pak.

Tek 2 Korintasve 3:18, Pali thotë që teksa ne vështrojmë Perëndinë në Fjalën e Tij, ne po shndërrohemi ose po ndryshohemi duke u bërë sipas shëmbëlltyrës së Tij dhe se kjo gjë ndodh ♥ *“nga lavdia në lavdi.”*

Më pas tek Romakëve 12:2, ne lexojmë se jemi transformuar nga gjithë ripërtëritja e mendjeve tona dhe nga këto mendime, ideale dhe qëndrime të reja ne

vërtetojmë për veten se cili është ♥ *“i miri, i pëlqyeri dhe i përsosuri vullnet i Perëndisë [për ne].”*

Tek Kolosianëve 1:27, Pali thotë se misteri i epokave është Krishti që jeton tek ne, shpresa e lavdisë. Ati yt qiellor të sheh të mbuluar me lavdi. Ai ka një vizion të tillë për ty në një gjendje të lartësuar saqë dërgoi Frymën e Tij që të banojë tek ty në mënyrë që të sigurohet që kjo gjë të realizohet.

Unë e përkufizoj fjalën “lavdi” si një shpalosje të të gjithë shkëlqimit të Perëndisë sonë. Vendose shpresën tek Ai dhe beso se gjithë këto Shkrime janë për ty.

Mëso që të bësh shpallje pozitive, plot besim, të bazuara tek Fjala. Thuaj me zë të lartë: “Unë po transformohem në shëmbëlltysin e Perëndisë nga lavdia në lavdi.” (2 Korintasve 3:18). “Krishti që jeton tek unë është shpresa që unë kam për të qenë më i lavdishëm. Fryma e Perëndisë po më shndërron çdo ditë, pak nga pak. Jeta ime ka një qëllim. Perëndia ka një plan të mirë për mua.”

Kujto, sipas Romakëve 4:17, ne i shërbejmë një Perëndie I Cili “i thërret” ato gjëra që nuk janë sikur të ishin.

Çfarë thotë Perëndia për ne në Fjalën e Tij?

♥ ... ju jeni fis i zgjedhur, priftëri mbretërorë,

komb i shenjtë, popull i fituar nga Perëndia,
që të shpallni lavdinë e atij, që ju thirri
nga terri në dritën e tij të mrekullueshme.

1 E PJETRIT 2:9

Perëndia synon që të shfaqë ose të shpalosë, të tregojë hapur aty ku mund të shihen, veprat, virtytet dhe përsosmëritë e mrekullueshme që Ai ka planifikuar për ty.

Mëso të thuash: “Unë jam thirrur që të dal nga errësira në dritën e lavdishme të Perëndisë.”

Të pasurit e një imazhi të ulët për veten është errësirë. Të mos e pëlqesh veten është errësirë. Të mendosh se nuk ke vlerë është errësirë.

Tek Malakia 3:17, ne mësojmë se jemi margaritarët e Perëndisë, zotërimi i Tij i jashtëzakonshëm, thesari i Tij i veçantë. Ti ke një fat. Perëndia ka një plan madhështor për jetën tënde. Ti ke një rol për të ruajtur në histori, por duhet ta besosh që ta ndër marrësh atë rol.

Ti mund të thuash: “Por Xhois, unë kam dështuar kaq shumë herë. Kam bërë kaq shumë gabime sa që e di se e kam zhgënjyer Perëndinë.”

Tek Filipianëve 3:13, 14, Pali e pranon se ai akoma nuk e kishte arritur përsosmërinë, por gjithashtu shpall se nuk po dorëzohej:

♥ Vëllezër, unë, nuk e llogaris veten time se e kam kapur, por një gjë po bëj [kjo është aspirata ime]: duke harruar ato që kam lënë pas, dhe duke u zgjatur drejt atyre që kam përpara,

po ndjek pas synimin, drejt çmimit [më të lartë dhe qiellor] të thirrjes së lartme të Perëndisë në Krishtin Jezus.

Perëndia ka një plan të mirë për jetën tënde. Mos jeto në të kaluarën. Dëgjo Fjalën e Zotit ashtu siç shkruhet tek Isaia 43:18,19:

♥ Mos kujtoni më gjërat e kaluara, mos shqyrtoni më gjërat e lashta.

Ja, unë po bëj një gjë të re; ajo do të lëshojë degë; nuk do ta njihni ju? Po, do të hap një rrugë nëpër shkretëtirë, do të bëj që lumenjtë të rrjedhin në vendet e vetmuara.

Në përfundim, dëgjo atë që po të thotë Perëndia tek Isaia 43:25: ♥ *“Unë, pikërisht unë, jam ai që për hir të vetvetes fshij shkeljet e tua dhe nuk do t'i mbaj mend mëkatet e tua.”*

Perëndia dëshiron kaq shumë që të të shohë të bëhesh gjithçka që Ai ka planifikuar të jesh. Ai do që të të shohë të shijosh plotësisht jetën e mirë që ka pëgatitur për ty. Ai është i gatshëm që nëpërmjet hirit dhe dhembshurisë së Tij të heqë çdo gjë që ke bërë gabim në të kaluarën. Ai madje ka marrë masa edhe për të gjitha gabimet që do të bësh në të ardhmen.

Ti nuk ke pse të jetosh në keqardhje për të kaluarën, as në frikë për të ardhmen. Perëndia është i gatshëm që tv të ndihmojë me çdo mënyrë që ke nevojë.

Isaia 40:31 premton që: ♥ *“...ata që shpresojnë [presin, kërkojnë dhe shikojnë] te Zoti fitojnë forca të reja, ngrihen me krahë [pranë Zotit] si shqiponjat [që ngrihen lart drejt diellit], vrapojnë pa u lodhur dhe ecin pa u drobitur.”*

Ç’bindje e mahnitshme për dashurinë e patundur të Perëndisë dhe çfarë sigurimi i mrekullueshëm për çdo nevojë me të cilën do të përballësh në ditët e ardhshme!

Të armatosur me premtimet e Tij të mrekullueshme dhe planet e Tij të çmuara, e shohim të ardhmen me shpresë dhe besim, të sigurt se atë që ka premtuar, Ai është plotësisht në gjendje që ta realizojë. (Romakëve 4:21)

Mos shih prapa, shih përpara. Hidh një hap besimi.

Mbaj mend, ti ke përpara një fat hyjnor për të përmbushur!

3



TË NJOHËSH DREJTËSINË TËNDE NË KRISHTIN

Tani do të doja që të shihnim së bashku disa Shkrime për drejtësinë.

Kënga “Unë Jam Bërë Drejtësia e Perëndisë” (I Have Been Made the Righteousness of God) flet për birësimin në familjen e Perëndisë dhe qëndrimin para fronit të Tij si një pjesëtar i familjes mbretërore, i plotë në Jezusin dhe një bashkë-trashëgimtar me Të, pa mëkat, i blerë nga gjaku i Tij i çmuar.¹

Ti je drejtësia e Perëndisë në Jezus Krishtin, siç Pali shkroi tek 2 Korintasve 5:21: ♥ “Sepse Atë, që nuk njihte mëkat, [Perëndia] e bëri mëkat [virtualisht] për ne, që ne të bëhemi [të pajisemi, të shihemi si të drejtë ose shembuj]

1. Teksti dhe muzika nga Chris Sellmeyer © 1992 nga Life in the Word, Inc.

të drejtësisë së Perëndisë në të [ajo çfarë duhet të jemi, të aprovuar, të pranuar dhe në një marrëdhënie të drejtë me Të, nëpërmjet mirësisë së Tij].”

Psalmi 48:10 flet për Zotin: ♥ *“Ashtu si emri yt, o Perëndi, kështu lëvdimi yt arrin deri në skajet e tokës; dora jote e djathtë është tërë drejtësi.”*

Dora e Perëndisë është shtrirë drejt teje, e mbushur me drejtësi.

Tek 1 Korintasve 1:8, Apostulli Pal siguron se:

♥ *“(Perëndia) edhe do t’ju vërtetojë deri në fund, që të jeni të paqortueshëm në ditën e Zotit tonë Jezu Krisht (Mesias).”*

A e di se ç’do të thotë kjo? Kjo do të thotë se Perëndia po të sheh ty në një qëndrim të drejtë tani. Sot, Ai të ka pikërisht aty ku dëshiron që të të ketë. Ai qëndron gati për të të mbrojtur nga gënjeshttrat e Satanit, akuzuesit të vëllezërve. (Zbulesa 12:10)

Në qoftë se e ke vendosur besimin tek Jezus Krishti, Perëndia nuk të sheh si fajtor. Ai është i gatshëm që të vërtetojë pafajësinë tënde.

Tek Predikimi në Mal, Jezusi iu tha ndjekësve të Tij: ♥ *“Lum (kjo është gjendja ku fëmija i rilindur i Perëndisë shijon favorin dhe shpëtimin e Tij) ata që janë të uritur dhe të etur për drejtësi (për një qëndrim të drejtë përpara Perëndisë), sepse ata do të ngopen!”* (MATEU 5:6)

Sipas Jezusit, duke qenë një fëmijë i rilindur i Perëndisë, ti ke të drejtën që të jetosh në një gjendje në të cilën mund të shijosh favorin e Perëndisë. Ke të drejtën që ta shijosh jetën. Është dhurata e Perëndisë për ty.

Fillo duke shpallur këtë thënie: “Unë jam drejtësia e Perëndisë në Krishtin Jezus.”

Ndoshta ke marrë mbi vete barrën që të mundohesh ta bësh veten të drejtë përpara Perëndisë. Nuk është ajo mënyra se si vjen drejtësia. Drejtësia, ashtu si shpëtimi, nuk është një punë; është një dhuratë. Hiq dorë nga përpjekjet e tua dhe mëso që t'i besosh Perëndisë që Ai të të japë drejtësinë e Krishtit.

♥ *“Hidh mbi Zotin barrën tënde dhe ai do të të mbajë; ai nuk do të lejojë kurrë që i drejti të lëkundet (të rrëshqasë, të bjerë ose të dështojë)” (PSALMI 55:22).*

Tek Romakëve 4:1-3, Pali flet për drejtësinë e Abrahamit:

♥ ... Çfarë do të themi, pra, se përfitoi ati ynë Abrahami, sipas mishit? [Ç’ndikim ka kjo tek pozicioni i tij dhe çfarë u fitua nga ai?]

Sepse, nëse Abrahami u drejtësua (u vendos si i drejtë duke iu hequr faji) nëpërmjet veprave (që

ai bëri, atëherë) ai ka me se të mburret; por jo përpara Perëndisë.

Sepse, çfarë thotë Shkrimi? «Por Abrahami i besoi Perëndisë (u mbështet tek Perëndia) dhe kjo iu llogarit për drejtësi» (një jetesë e drejtë dhe një qëndrim i drejtë para Perëndisë).

Më pas, tek vargjet 23 dhe 24 Pali vazhdon duke thënë:

♥ Dhe nuk u shkrua vetëm për të, që kjo i ishte llogaritur

por (u shkrua) edhe për ne, të cilëve do të na llogaritet (drejtësia, qëndrimi i pranueshëm para Perëndisë), neve që besojmë (mbështetemi dhe mbahemi) në atë që ka ringjallur prej së vdekurish Jezusin, Zotin tonë.

Me fjalë të tjera, ajo që po na thotë Pali këtu është se ne e marrim drejtësinë nëpërmjet besimit, dhe jo asaj që bëjmë.

Kur ne besojmë tek Jezus Krishti, Perëndia na sheh si të drejtë. Në kuptimin e plotë të fjalës, Ai merr një vendim që të na shohë si të drejtë me Të për shkak të gjakut të

Jezusit. Ai është Perëndia sovran dhe Ai ka të drejtën që ta marrë këtë vendim në qoftë se zgjedh kështu.

Në vargun e parë të kapitullit të ardhshëm, Pali përmbledh thelbin e asaj që po thotë: ♥ *“Të drejtësuar (të shfajësuar, të deklaruar të drejtë dhe me një qëndrim të drejtë përpara Perëndisë), pra, prej besimit, kemi paqe me Perëndinë (paqe pajtimi për t’u mbajtur dhe shijuar), nëpërmjet Jezu Krishtit (Mesias, Të Vajosurit), Zotit tonë.”* (ROMAKËVE 5:1).

Drejtësia nuk vjen nëpërmjet veprave tona të mekura; ajo vjen nëpërmjet veprës së përfunduar të Jezusit.

Tek Psalmi 37:25, Davidi shkroi: ♥ *“Unë kam qenë fëmijë dhe tani jam plakur, por nuk e kam parë kurrë të drejtin (e paepur) të braktisur dhe pasardhësit e tij të lypin bukë.”*

Unë besoj se në qoftë se ne si prindër do të mund ta mbanim fort pozitën tonë të drejtë me Perëndinë nëpërmjet Krishtit, edhe fëmijët tanë do mund ta përvetësonin këtë drejtësi.

Fëmijët që rriten nga prindër të cilët ndihen fajtorë, të ndëshkuar dhe të pavlerë përgjithësisht i përvetësojnë këto ndjenja nga prindërit.

Po ashtu, në qoftë se prindërit e kuptojnë dhe besojnë se Perëndia i do ata, se ata janë të veçantë për Të, se Perëndia ka një plan të mirë për jetën e tyre, se

ata janë drejtësuar nëpërmjet gjakut të Krishtit, atëherë fëmijët që jetojnë nën mburojën e kësaj të vërtete do të ndikohen nga besimi i prindërve të tyre dhe do ta marrin Jezusin dhe të gjitha premtimet e Tij si të vetat.

Fjalët e Urta 20:7 na thotë se: ♥ *“I drejti ecën në ndershmërinë e tij; bijtë e vet do të bekohen (do të jenë të lumtur, plot mbarësi dhe për t’u marrë shembull) pas tij.”*

Dhe tek Psalmi 37:39, ne lexojmë: ♥ *“Por shpëtimi i të drejtëve [në mënyrë të qëndrueshme] vjen nga Zoti; ai është kështjella e tyre në kohën e fatkeqësisë.”*

Zoti është në anën tënde Pali. Fjala e Tij është e vërtetë dhe ajo premtion paqe, drejtësi, siguri dhe triumf mbi kundërshtimet.

Mëso që ta shpallësh këtë premtim nga Zoti, që gjendet tek Isaia 54:17: ♥ *“Asnjë armë e sajuar kundër teje nuk do të ketë sukses dhe çdo gjuhë që do të ngrihet të gjykojë kundër teje, ti do ta dënosh. Kjo (paqja, drejtësia, siguria, triumfi mbi kundërshtitë) është trashëgimia e shërbëtorëve të Zotit (ata tek të cilët riprodhohet Shërbëtori ideal i Perëndisë) dhe drejtësia e tyre vjen nga unë [këtë iu jap atyre si shfaqësim]», thotë Zoti.”*

Tek Psalmi 34:15 Davidi na thotë:

♥ Sytë e Zotit janë mbi të drejtët (e paepur) dhe

veshët e tij janë të vëmendshëm ndaj britmës së tyre.

Fjalë për fjalë kjo do të thotë që Perëndia po të sheh dhe po të dëgjon sepse Ai të do.

Më pas, tek vargjet 17, 19 dhe 22 Davidi vazhdon duke thënë:

♥ Të drejtët klithin dhe Zoti i dëgjon dhe i çliron nga të gjitha fatkeqësitë e tyre...

Të shumta janë vuajtjet e njeriut të drejtë (në mënyrë të vazhdueshme), por Zoti e çliron nga të gjitha...

Zoti shpengon jetën e shërbëtorëve të tij, dhe asnjë nga ata që gjejnë strehë te ai nuk do të shkatërrohet.

Nga koha kur ti e pranon Jezusin si Shpëtimtar, ti je duke u rritur në Të. Mund të thuhet se je në një udhëtim. Ndërkohë që je duke ecur, mund të bësh disa gabime. Efektshmëria jote mund të mos jetë e përsosur, por në qoftë se zemra jote është e përkryer kundrejt Zotit, besoj se Ai të llogarit si të përsosur ndërkohë që ti je duke bërë këtë udhëtim.

Tek Isaia 54:14, Zoti shpall: ♥ *“Ti do të vendosesh ngultas*

në drejtësi (në përputhje me vullnetin dhe urdhrin e Perëndisë); do të jesh larg nga shtypja, sepse nuk duhet të trembesh më, edhe nga tmërri, sepse nuk do të të afrohet më ty.”

Tek Fjalët e Urta 28:1 thuhet se ai që është i drejtë në mënyrë të paepur, është guximtar si një luan. Kur ti e di se je i drejtë me anë të Krishtit, kur ke një zbulesë të vërtetë në këtë sferë, atëherë nuk jeton më me frikë dhe llahtar, ngaqë drejtësia prodhon guxim:

♥ Sepse ne nuk kemi një kryepriфт që nuk mund të vuajë bashkë me dobësitë tona, por që u tundua në të gjitha njësot si ne, por pa mëkat.

Le t'i afrohem, pra, me guxim fronit të hirit, që të marrim mëshirë e të gjejmë hir, për të pasur ndihmë në kohën e duhur.

HEBRENJVE 4:15,16

Ne mund t'i afrohem fronit të hirit të Perëndisë me guxim, jo për shkak të përsosmërisë sonë, por për shkak të së Tijës: ♥ *“Shumë më tepër, pra [është e sigurt], duke qenë tani të drejtësuar (të shfajësuar, të bërë të drejtë, duke hyrë në një marrëdhënie të drejtë me Perëndinë) nëpërmjet gjakut të tij, do të shpëtohem nga zemërimi me anë të tij.”* (ROMAKËVE 5:9)

Ndoshta gjithë jetën tënde ke pyetur veten: “Çfarë kam unë që nuk shkon?”

Po të jetë kështu, po të jap një lajm të mirë: **ti je drejtësuar!**

Tani ka diçka **të drejtë** në ty.

Kjo është diçka që ua inkurajoj të gjithëve që ta shpallin gjatë gjithë kohës: “Unë mund të mos jem aty ku duhet të jem, por faleminderit Perëndisë, nuk jam aty ku kam qenë. Jam mirë dhe po eci në rrugën time.”

Mbaje mend, ndryshimi është një proces, dhe ti je në atë proces. Ndërkohë që ti po ndryshon, Perëndia të sheh si një person të drejtë.

Ti je i drejtë. Është gjendja në të cilën të ka vendosur Perëndia nëpërmjet gjakut të Jezusit.

Ndryshimet që ndodhin në jetën tënde janë një manifestim i pozitës së drejtë që Perëndia ta ka dhënë me anë të besimit.

Lavdi i qoftë Perëndisë!

Kjo është e fuqishme!

Teksa pranon dashurinë dhe drejtësinë e Perëndisë, ti do të çlirohesh nga pasiguria dhe frika e refuzimit.

Në këtë moment, ndalu dhe shpall: “Unë jam drejtësia e Perëndisë në Jezus Krishtin.” Të inkurajoj që të fillosh ta deklarosh këtë të vërtetë disa herë për çdo ditë.

Tek Romakëve 14:17, Apostulli Pal na thotë se:

♥ *“mbretëria e Perëndisë nuk është të ngrënët dhe të pirët, por drejtësi dhe paqe dhe gëzim në Frymën e Shenjtë.”* Drejtësia të çon tek paqja dhe paqja të çon tek gëzimi.

Në qoftë se të ka munguar paqja dhe gëzimi, ndoshta të ka munguar zbulesa për drejtësinë tënde. Perëndia dëshiron që të të bekojë, fizikisht dhe financiarisht.

Megjithatë, pjesa më e madhe e personave fajtorë dhe të ndëshkuar nuk arrijnë kurrë që të kenë një mbarësi të vërtetë. Bibla na mëson se të drejtët, ata që e dinë se janë të drejtë, kanë mbarësi dhe janë të sigurt.

A e di se çfarë thotë Perëndia për ty? Tek Psalmi 1:3, Ai thotë se njeriu që gjen kënaqësinë e tij në ligjin e Zotit dhe në udhëzimet e Tij është si një pemë e mbjellë përgjatë brigjeve të ujit që jep frytin e vet në stinën e vet. Gjethet e tua nuk do të fishken dhe çdo gjë që do të bësh do të ketë mbarësi dhe sukses.

Medito për qëndrimin tënd të drejtë kundrejt Perëndisë, jo për çdo gjë që nuk shkon siç duhet në jetën tënde.

Siç e kemi parë, tek Jozueu 1:8: ♥ *“Ky libër i ligjit mos u ndaftë kurrë nga goja jote, por mendohu për të ditë e natë, duke kërkuar të veprosh sipas të gjitha atyre që janë shkruar, sepse atëherë do të kesh sukses në veprimet e tua, atëherë do të përparosh.”*

Kujto se tek Psalmi 1:2, 3 thuhet se kur vazhdimisht të kesh medituar mbi Fjalën e Perëndisë ditë dhe natë, atëherë do të jesh si ajo pema e palëkundur me rrënjë të thella që prodhon fryt dhe përparon në çdo gjë që bën.

Medito mbi Fjalën dhe thuaje atë. Kur Satani sulmon mendjen tënde, kundërsulmoje me Fjalën e Perëndisë. Mbaj mend, Jezusi e mposhti djallin duke folur Fjalën, duke thënë:

♥ “Është shkruar...” (LUKA 4:4, 8, 10).

Tek Fjalët e Urta 18:10 thuhet: ♥ “Emri i Zotit është një kala e fortë [mbi të ligun], tek ai turret i drejti [i paepur] [ai që ka një qëndrim të drejtë kundrejt Zotit] dhe mbrohet.”

Tek Psalmi 72:7 thuhet se i drejti ♥ “... do të lulëzojë dhe ka për të pasur shumë paqe, derisa të mos ketë më hënë.”

Pranoje drejtësinë përpara Perëndisë në mënyrë që të fillosh të lulëzosh në paqe.

Ti mund të jesh duke menduar: “Po të gjitha ato gjëra të tmerrshme që kam bërë?”

Dua të të rikujtoj për fjalët e thëna nga Perëndia për popullin e Tij siç shkruhet tek Letra Drejtuar Hebrenjve 10:16-18:

♥ «Kjo është besëlidhja që unë do të bëj me ata pas atyre ditëve, thotë Zoti, unë do t'u jap ligjet

e mia në zemrat e tyre dhe do t'i shkruaj në mendjet e tyre» (në mendimet e tyre më të thella dhe kuptimin ose perceptimin më të plotë),

... Dhe nuk do t'i kujtoj më mëkatet e tyre dhe paudhësitë e tyre.

Por atje ku ka ndjesë (falje dhe anulim të ndëshkimit) të këtyre gjërave (mëkateve dhe shkeljeve), nuk ka më ofertë për mëkatin.

Me fjalë të tjera, mëkatet e tua janë fshirë në mënyrë absolute bashkë me ndëshkimin për to. Meqenëse Jezusi ka bërë një vepër të tillë të plotë dhe tërësore, nuk ka asgjë që mund të bësh për të zëvendësuar të keqen e mëkateve të tua. E vetmja gjë që mund të bësh, e cila do t'i pëlqejë Perëndisë, është që të pranosh, me besim, atë që Ai ta jep falas.

Tek Letra Drejtuar Hebrenjve 10:19, 20 flitet për Jezusin dhe thuhet se nëpërmjet sakrificës së Tij Ai ka hapur ♥ *“një udhë të re (të porsabërë) dhe të gjallë”* nëpërmjet të cilës ne mund të jemi plot me lirinë dhe sigurinë për të hyrë në praninë e Tij ♥ *“nëpërmjet fuqisë dhe virtytit”* që është në gjakun e Tij.

Nuk ka më nevojë që të ketë një vel ndarës mes teje dhe Perëndisë.

Ç'lajm i lavdishëm!

Ti mund të hysh **me guxim** dhe të kesh miqësi me Perëndinë për shkak se mëkati yt është anuluar, është hequr dhe harruar.

Gëzohu! Ti je drejtësia e Perëndisë në Krishtin! (2 Korintasve 5:21)

4



KAPËRCIMI I FRIKËS NË JETËN TËNDE

A ke frikëra për veten tënde?

Tek kënga: “Mos Ki Frikë, Fëmija Im” (Fear Not My Child) Zoti flet me këto fjalë jete:

*“Mos ki frikë, Fëmija Im
Unë jam gjithmonë me ty
E ndjej çdo dhembje
Dhe i shoh gjithë lotët e tu,
Mos ki frikë, Fëmija Im
Unë jam gjithmonë me ty
Sepse Unë di si të kujdesem
Për atë që më përket Mua.”¹*

1. ©1986 Some-o-Dat Music (Administruar nga WORD Music).
Të gjitha të drejtat të rezervuara. Përdorur me leje.

Tek 2 Timoteut 1:7, Apostulli Pal i shkruan dishepujve të tij të rinj që t'i nxisë për të mos pasur frikë për të ushtruar shërbesën e tij: ♥ *“Sepse Perëndia nuk na ka dhënë frymë frike (frymë burracake, pa guxim dhe poshtëruese), por [na ka dhënë frymë] force, dashurie dhe mendjekthjelltësie.”*

Mbaje mend këtë varg. Fiksoje dhe përsërite sa herë që ndihesh i frikësuar apo në ankth.

Frika nuk është nga Perëndia. Satani është i vetmi që do të të mbushë zemrën me frikë. Perëndia ka një plan për jetën tënde. Pranoje planin e Tij duke e vënë besimin tënd te Ai. Por, mbaj mend që edhe satani ka gjithashtu një plan për ty. Në qoftë se ke frikë, kjo do të thotë që ti po e pranon planin e tij.

Davidi shkruan në këtë psalm: ♥ *“Unë e kërkoja Zotin (duke u mbështetur tek autoriteti i Fjalës së Tij u mundova ta gjej dhe kisha nevojë për Të), dhe ai m'u përgjigj dhe më çliroi nga të gjitha tmerret e mia” (PSALMI 34:4).*

Jezusi është Çliruesi yt. Ndërsa do ta kërkoesh Atë me zell, Ai do të të çlirojë nga të gjithë frikërat e tua. Tek Gjoni 14:27 Ai i thotë dishepujve të Tij të frikësuar:

♥ *“...zemra juaj mos u tronditë dhe mos u frikësoftë. [Mos lejoni më që të shqetësoheni dhe të keni frikë, as që të trembeni, të dyshoni e të jetoni të turbulluar në shpirt]”*

Kjo do të thotë që ti duhet të mbash një qëndrim të

egër ndaj frikës. Merr vendimin sot që nuk do ta lejosh më frymën e frikës të bëhet shok i ngushtë me ty dhe të sundojë jetën tënde.

Tek Psalmi 56:3,4, Davidi i thotë Zotit:

♥ Kur të kem frikë, do të mbështetem te ti.

Me ndihmën e Perëndisë do të kremtoj fjalën e tij; kam vënë besimin tim te Perëndia, nuk do të kem frikë. Çfarë mund të më bëjë njeriu?

Tek Isaia 41:10, Zoti i jep siguri popullit të Tij:

♥ *“Mos ki frikë (nuk ke pse të trembesh), sepse unë jam me ty, mos e humb, sepse unë jam Perëndia yt. Unë të forcoj dhe njëkohësisht të ndihmoj dhe të mbaj me dorën e djathtë (fitimtare) të drejtësisë sime.”*

Shkrimtari i Letrës Drejtuar Hebrenjve 13:5 na paralajmëron kundrejt orvatjes për pasuri dhe siguri tokësore, duke na kujtuar: ♥ *“Sjellja juaj të jetë pa lakmi paraje dhe kënaquni me atë që keni, sepse vetë Perëndia ka thënë: «**Nuk do të të lë, as nuk do të të braktis.** [Në asnjë mënyrë, në asnjë mënyrë, në asnjë mënyrë, nuk do të të lë pa përkrahje, as nuk do të heq dorë prej teje (nuk do të ta lëshoj dorën kurrë)! Kurrën e kurrës!]”*

Më pas në vargun 6, shkrintari vazhdon duke thënë: ♥ *“Kështu mund të themi, me guxim: «Zoti është ndihmuesi im dhe unë nuk do të kem frikë; [nuk do më mbërthejë paniku, nuk do trembem, as nuk do tmerrohem] ç’do të më bëjë njeriu?»”*

Frika nënkupton **prova të rreme që në sytë e tu duken sikur janë të vërteta**. Armiku do që të të thotë se situata jote aktuale vërteton që e ardhmja jote do të jetë një dështim, por Bibla na mëson se pavarësisht se çfarë janë rrethanat tona të tanishme, pavarësisht sa keq duken gjërat, asgjë nuk është e pamundur me Perëndinë. (MARKU 9:17-23)

Tek Isaia 41:13, na thuhet: ♥ *“Sepse unë, Zoti, Perëndia yt, të zë nga dora e djathtë dhe të them: “Mos u frikëso, unë të ndihmoj.”* Kjo do të thotë se nuk ke pse të kesh frikë kur dëgjon lajme të këqija. Qëndro me besim tek Perëndia. Ai mund të bëjë që të gjitha gjërat të japin zgjidhjen për të mirën tënde.

Tek Letra Drejtuar Romakëve 8:28, Apostulli Pal na kujton se të gjitha gjërat bashkëveprojnë për mirë për ata që e duan Perëndinë dhe që janë thirrur sipas planit dhe qëllimit të Tij.

Tek Isaia 43:1-3, lexojmë: ♥ *“Por tani kështu thotë Zoti, që të ka krijuar, o Jakob, dhe që të ka formuar, o Izrael: «Mos*

ki frikë, sepse unë të kam shpenguar, të kam thirrur me emër; ti më përket mua. Kur të kalosh përmes ujërave, unë do të jem me ty, ose të kalosh lumenjtë, nuk do të të mbytin; kur të ecësh nëpër zjarr, nuk do të digjesh dhe flaka nuk do të të përpijë. Sepse unë jam Zoti, Perëndia yt, i Shenjti i Izraelit, Shpëtimtari yt...”

Mëso që t'i shpallësh me zë të lartë këto Shkrime mbi frikën. Thuaji atëherë kur je vetëm. Përcakto në mbretërinë frymërore se nuk ke ndërmend që të jetosh në frikë. Duke e shpallur Fjalën e Perëndisë, po i komunikon qartë djallit se nuk ke ndërmend që ta kalosh jetën duke u torturuar apo duke u ndëshkuar.

Mbaj mend, Bibla na thotë se frika ka të bëjë me ndëshkimin ose torturën (1 e Gjonit 4:18). Jezusi vdiq për të na çliruar nga ndëshkimi, siç e shohim tek Efesianëve 3:12,13, ku Pali na thotë se për shkak të besimit tonë tek Jezus Krishti:

♥ ... kemi lirinë (guximin dhe sigurinë) dhe hyrjen te Perëndia (një afrim të parrezervuar për tek Zoti plot çlirim dhe pa frikë) në mirëbesimin nëpërmjet besimit në të.

Për këtë arsye, ju lutem që të mos ligështoheni [të mos e humbisni toruan, të mos brengoseni nga frika] ...

Tek Psalmi 46:1, 2 na sillet në kujtesë:

♥ Perëndia është për ne një strehë dhe një forcë [e fuqishme dhe e padepërtueshme ndaj tundimit], një ndihmë gjithnjë e gatshme në fatkeqësi.

Prandaj ne nuk do të kemi frikë edhe sikur toka të luajë dhe malet të hidhen në mes të detit.

Tek kapitulli i parë i Jozueut, Perëndia në mënyrë të përsëritur e inkurajon Jozueun që ♥ *“Ji i fortë dhe trim”* (v. 6) duke e siguruar: ♥ *“Zoti, Perëndia yt, është me ty kudo që të shkosh”* (v. 9). Prandaj ti nuk ke pse të kesh frikë. Dhe mesazhi i Perëndisë për ty është i njëjti si ai që ishte për Jozueun.

Perëndia është me ty. Ai nuk do të të lerë e as nuk do të të braktisë (Hebrenjve 13:5). Syri i Tij është mbi ty gjatë gjithë kohërave (Psalmi 33:18). Ai e ka gdhendur pamjen tënde në pëllëmbën e të dy duarve të Tij (Isaia 49:16). Prandaj, nuk ke pse të kesh frikë. Bëhu i fortë, i sigurt, plot guxim, mos u tremb.

Tek Mateu 6:34, tek Predikimi mbi Mal, Jezusi i mësoi ndjekësit e Tij: ♥ *“Mos u shqetësoni, pra, për të nesërmen, sepse e nesërmyja do të shqetësohet vetë për vete.*

Secilës ditë i mjafton e keqja e vet.”

Tek Mateu 8:23-27, lexojmë se si u frikësuan dishepujt nga stuhia në det: ♥ *“Dhe ai u tha atyre: «Pse keni frikë, o njerëz besimpakë?». Dhe, pasi u ngrit, qortoi erërat dhe detin; dhe u bë bunacë e madhe (një gjendje qetësie e përsosur)”* (vargu 26).

Tek Luka 12:25-26 (TLB) Jezusi bën pyetjen: ♥ *“Përse shqetësoheni? Ç’ë mirë ju vjen nga kjo? A do t’jua shtojë qoftë edhe për një ditë jetën tuaj? Sigurisht që jo! Atëherë, kur shqetësimi nuk është në gjendje të bëjë as këtë që është më e pakta, përse shqetësoheni për të tjerat, më të mëdhatë?”*

“Mos u frikëso,” tha Isaia tek kapitulli 54, vargu 4;

♥ *“sepse nuk do të ngatërroshesh; mos ki turp, sepse nuk do të skuqesh; do të harrosh madje turpin e rinisë sate dhe nuk do ta kujtosh më çnderimin e vejërisë sate. Sepse krijuesi yt është dhëndri yt; emri i tij është Zoti i ushtrive; Shpengimtari yt është i Shenjti i Izraelit, i quajtur Perëndi i tërë tokës.”*

Pastaj tek Isaia 35:4, lexojmë: ♥ *“U thoni atyre që e kanë humbur zemrën: «Bëhuni të fortë, mos kini frikë!». Ja, Perëndia juaj do të vijë me hakmarrjen dhe me shpërblimin e Perëndisë; do të vijë ai vetë për t’ju shpëtuar.”*

Kërkoji Perëndisë që të përforcojë njeriun tënd të brendshëm, që forca dhe fuqia e Tij të mund të të mbushë dhe që të mos mposhtesh nga tundimi për t’iu

dorëzuar frikës. (EFESIANËVE 3:16)

Do të doja që të të tregoja një zbulësë të madhe që më ka dhënë Perëndia në lidhje me frikën. Kur Perëndia na flet nëpërmjet Fjalës së Tij dhe na thotë: ♥ *“Mos u frikëso!”*, Ai nuk po na urdhëron që të mos e ndjejmë frikën. Në fakt Ai është duke thënë: *“Kur ndihesh i frikësuar, pra, kur djalli të sulmon me frikë, mos u spraps dhe mos ia mbath me vrap. Përkundrazi, ec përpara edhe kur ke frikë.”*

Për shumë vjet, kam menduar se isha frikacake kur ndjehesha e frikësuar. Tani kam mësuar se mënyra për ta kapërcyer frikën është që të përballim me të direkt, që t'i kundërvihem dhe të vazhdoj përmes saj, duke bërë atë që më ka thënë Perëndia, edhe pse kjo mund të bëhet gjatë kohës që ndjehem e frikësuar.

Tek Psalmi 34:4, Davidi i tha Zotit: ♥ *“Sepse unë i thirra dhe Ai m'u përgjigj! Ai më çliroi nga të gjitha frikërat e mia.”* (Versioni i përkthimit *“Bibla e Gjallë”* [TLB]). Dhe Gjoni na kujton: *“Në dashuri nuk ka frikë [nuk ekziston tmerr], madje dashuria e përsosur (e plotë dhe e rritur tërësisht) e nxjerr jashtë frikën, sepse frika ka të bëjë me ndëshkimin dhe ai, që ka frikë nuk është i përsosur në dashurinë [nuk është rritur akoma në përsosmërinë e plotë të dashurisë]”* (1 E GJONIT 4:18)

Mbaj mend, Perëndia të do! Dhe ngaqë Ai të do dhe

përkujdeset për ty me një dashuri të përsosur, ti mund të jetosh i çliruar nga frika.

Ndoshta ti ke kaq shumë frikëra gjatë kësaj kohe në jetën tënde sa që të jetosh i çliruar nga frika duket si një ëndërr e pamundur. Në qoftë se kjo është e vërtetë, ka diçka që duhet të mbash mend: Perëndia mund të të çlirojë krejtësisht nga çdo problem, menjëherë, por Ai shpesh na çliron pak nga pak. Prandaj, inkurajohu se Zoti është duke vepruar brenda teje. Perëndia ka filluar një punë të mirë në ty dhe Ai **do ta** përfundojë atë. (FILIPIANËVE 1:6)

♥ *“Zoti është drita ime dhe shpëtimi im; nga kush do të kem frikë? Zoti është kështjella e jetës sime; nga kush do të kem frikë?”* pyet psalmisti tek kapitulli 27, vargu 1. ♥ *“Kur njerëzit e këqij, armiq të dhe kundërshtarët e mi më sulmuan për të ngrënë mishin tim, ata vetë u lëkundën dhe ranë. Edhe sikur një ushtri të dilte kundër meje, zemra ime nuk do të kishte frikë; edhe sikur një luftë të pëlciste kundër meje, edhe atëherë do të kisha besim.”*

Tek vargjet 5 dhe 6 në të njëjtin fragment Davidi vazhdon duke thënë se kur vijnë telashet, Perëndia do ta fshehë atë. Ai do ta vendosë në një shkëmb të lartë, larg prej të gjithë armiqve të tij. Më pas, ai thotë se ai do t'i sjellë Zotit sakrifica dhe do ta lavdërojë atë me këngë

të mbushura plot gëzim.

Atë që Perëndia e bëri për Mbretin David, Ai do ta bëjë për ty. Vendose besimin tek Zoti. Ai ka fuqinë që të të çlirojë nga çdo frikë.

Dëgjo këto fjalë që Engjëlli i Perëndisë i tha Danielit, duke e siguruar se lutjet e tij më në fund ishin dëgjuar: ♥ *“...Atëherë ai më tha: «Mos ki frikë, Daniel, sepse që ditën e parë që vendose në zemrën tënde të kuptoje dhe të përuleshe para Perëndisë tënd, fjalët e tua u dëgjuan dhe unë erdha si përgjigje [dhe si rrjedhojë] e fjalëve të tua”.* (DANIELI 10:12)

Djali do të mundohet që të të thotë se Perëndia nuk e ka dëgjuar lutjen tënde dhe nuk do të të përgjigjet. Mbaj mend se Fjala e Perëndisë është shpata e Frymës (EFESIANËVE 6:17). Me shpatën e Frymës, ti e mposht armikun. Fshihi këto Shkrime në zemër, medito mbi to ditë dhe natë.

Vetëm me Fjalën e Perëndisë do të jesh në gjendje që ta mposhtësh armikun. Vetëm kur ta dish Fjalën e Perëndisë do të njohësh gënjeshttrat e Satanit. Shpalle Fjalën e Perëndisë dhe ajo do të të sjellë në një vend fitoreje.

Ndoshta ke frikë që të flasësh me dikë që ka autoritet mbi ty. Ndoshta je akuzuar për diçka dhe shqetësohesh për atë që duhet të thuash për t'u mbrojtur. Dëgjo

fjalët e Jezusit tek Luka 12:11, 12: ♥ *“Dhe, kur do t’ju çojnë përpara ... parisë dhe autoriteteve ... mos u shqetësoni sesi ose se çfarë do të thoni për t’u mbrojtur, ose për çfarë do t’ju duhet të thoni, sepse Fryma e Shenjtë në atë orë do t’ju mësojë se ç’duhet të thoni.”*

Kur të tundohesh që t’i dorëzohesh frikës, përsërit Psalmin 23:1-6 si shpalljen e besimit tënd tek Zoti dhe tek sigurimi i Tij për ty si dhe përkujdesi i Tij vigjilues mbi ty:

♥ Zoti është bariu im, asgjë nuk do të më mungojë.

Ai më çon në kullota me bar të njomë, më prin tek ujërat e qeta.

Ai ma përtërin shpirtin, më prin nëpër shtigjet e drejtësisë, për hir të emrit të tij.

Edhe sikur të ecja në luginën e hijes së vdekjes, nuk do të kisha frikë nga asnjë e keqe, sepse ti je me mua; shkopi yt dhe kërraba jote janë ato që më japin zemër.

Ti shtron para meje tryezën në prani të armiqve të mi; ti vajos kokën time me vaj; kupa ime po kapërderdhet.

Me siguri pasuri dhe mirësi do të më shoqërojnë në gjithë ditët e jetës sime; dhe unë do të banoj në Shtëpinë e Zotit ditë të gjata.

PËRFUNDIM: QËNDRO I PATUNDUR



Në këtë libër, po ndaj me ty Shkrime për dashurinë e Perëndisë, të ardhmen e lavdishme që Ai ka planifikuar për ty, drejtësinë tënde në Krishtin dhe çlirimin nga frika.

Të gjitha premtimet e shënuara në këto Shkrime janë trashëgimia jote si një shërbëtor i Zotit. Megjithatë, duhet ta dish se djalli do të mundohet që t'i vjedhë ato. Ai do që ti të kthehesh sërish tek prangosja ku ishe.

Kjo është arsyeja pse Apostulli Pal na thotë tek Galatasve 5:1: ♥ *“Qëndroni, pra, në lirinë, me të cilën Krishti na liroi, dhe mos hyni përsëri nën zgjedhën e skllavërisë.”*

Disa prej pikave kyçe të jetës fitimtare të krishterë janë qëndrimi i paepur, durimi dhe rezistenca:

♥ Mos e hidhni tej guximin tuaj, që ka një

shpërblim të madh.

Sepse ju keni nevojë për durim që, mbasi të bëni vullnetin e Perëndisë, të merrni gjërat e premtuara.

HEBRENJVE 10:35, 36

Ati yt qiellor do që të shijosh plotësisht atë që u ble për ty me anë të gjakut të Jezus Krishtit. Tregohu i vendosur. Merr vendimin tani se nuk do të heqësh kurrë dorë. Shpall Shkrimet që flasin për të ardhmen derisa ato të jenë bërë pjesë e vetë qenies tënde.

Gjithmonë kujto se Perëndia të do dhe se ka jetë në Fjalën e Tij.

SHPALLJE BIBLIKE



*Hyrje: Fjala e Perëndisë**

Perëndia dërgon Fjalën e Tij dhe më shëron e më shpëton nga gropa dhe nga shkatërrimi. (PSALMI 107:20)

I bekuar (i lumtur, me fat, me mbarësi dhe për t'u marrë shembull) jam, sepse nuk eci sipas këshillës së të pabesëve [nuk ndjek porositë, planet dhe qëllimet e tyre], nuk ndalem [duke u nënshtruar dhe duke qëndruar joaktiv] në rrugën e mëkatarëve dhe nuk ulem [për t'u çlodhur dhe pushuar] bashkë me tallësit.

Por unë e gjej kënaqësinë në ligjin e Zotit (këshillat, udhëzimet dhe mësimet e Perëndisë) dhe mendoj (përsiatem dhe studioj) thellë ditë e natë mbi ligjin e tij.

Dhe do të jem si një dru i mbjellë [dhe i ruajtur]

*Shënim: Autori i ka personalizuar shpalljet në mënyrë që lexuesi t'iu referohet Shkrimeve në vetë të parë.

përgjatë brigjeve të ujit, që jep frytin e vet në stinën e vet dhe që gjethet nuk do i fishken; dhe gjithçka që do të bëj do të ketë mbarësi. (Psalmi 1:1-3)

Ky libër i ligjit mos u ndaftë kurrë nga goja ime, por unë do të mendohem për të ditë e natë, duke kërkuar të veproj sipas të gjitha atyre që janë shkruar, sepse atëherë do të kem sukses në veprimet e mia, atëherë do të përparoj. (Jozueu 1:8)

Fjala është shumë afër meje; është në gojën time dhe në zemrën time, unë mund ta zbatoj. (Ligji i Përtërirë 30:14)

Kështu do të jetë Fjala e Perëndisë, që del nga goja ime; ajo nuk do të kthehet bosh tek Ai [pa dhënë asnjë efekt, e padobishme], pa kryer atë që dëshiron Ai dhe pa realizuar plotësisht atë për të cilën e ka dërguar. (Isaia 55:11)

Për shkak se unë, duke soditur [tek Fjala e Perëndisë] fytyrëzbuluar lavdinë e Zotit si në pasqyrë, jam duke u shndërruar në të njëjtin shëmbëllim nga lavdia në lavdi, si prej Frymës së Zotit. (2 Korintasve 3:18)

Fjala e Perëndisë është E Vërteta. Ndërkohë që e studioj dhe meditoj mbi të, unë do ta njoh Të Vërtetën dhe E Vërteta do të më çlirojë. (Gjoni 17:17, Gjoni 8:32)

Kapitulli 1: Dashuria e Perëndisë

Por në të gjitha këto jam më shumë se fitimtar me anë të atij që më deshi.

Sepse jam i bindur se as vdekja, as jeta, as engjëjt, as pushtetet, as fuqia dhe as gjërat e tashme, as gjërat e ardhshme, as lartësitë, as thellësitë, as ndonjë tjetër krijesë, nuk do të mund të më ndajnë nga dashuria e Perëndisë që është në Jezu Krishtin, Zotin tim. (ROMAKËVE 8:37-39)

Sepse Perëndia më deshi kaq shumë, sa (madje) dha Birin e Tij (unik) të vetëmlindurin për mua, dhe tani që besoj në Të (mbështetem tek Ai, mbahem pas Tij, varem tek Ai), nuk do të humbas (nuk do shkatërrohem, nuk do të zhdukem), por kam jetën e përjetshme (që zgjat përjetë). (GJONI 3:16)

Vetë Ati më do (me dhembshuri), sepse unë e dua Jezusin dhe kam besuar se Jezusi doli nga Perëndia Atë. (GJONI 16:27).

Ngaqë kam urdhërimet e Jezusit dhe i mbaj ato, unë e dua [vërtet] Atë; dhe ngaqë e dua (vërtet), Ati im do të më dojë; dhe Jezusi (gjithashtu) do të më dojë dhe do të më shfaqet (do të më zbulohet, do të bëhet i dukshëm). [Do të lejojë që ta shoh qartë dhe do të bëhet i vërtetë për mua.] (GJONI 14:21)

Unë e dua Zotin, sepse ai më deshi i pari. (1 E GJONIT 4:19)

O Perëndi, sa e çmuar është mirësia jote! Prandaj unë gjej strehë nën hijen e krahëve të tu. (PSALMI 36:7)

Ti më ke hetuar, o ZOT, dhe më njeh tërësisht. Ti e di kur ulem dhe kur ngrihem, ti e kupton nga larg mendimin tim. Ti e shqyrton me kujdes ecjen time dhe pushimin tim. Kurdoherë e di ku jam. Sepse, edhe para se të jetë fjala mbi gojën time ti, o Zot, e di atë plotësisht. Ti më rrethon nga pas dhe përpara dhe vë dorën tënde të bekimit mbi kokën time.

Njohja jote është shumë e mrekullueshme për mua, aq e lartë sa nuk mund ta arrij. Ku do të mund të shkoja larg Frymës sate, ose ku do të mund të ikja larg pranisë sate?

Oh, sa të çmuara janë për mua mendimet e tua për mua, o Perëndi! Sa i madh është gjithë numri i tyre! Po të doja t'i numëroja, do të ishin më të shumta se rëra; kur zgjohem, jam ende me ty; ti vazhdon të mendohesh për mua. (PSALMI 139:1-7, 17,18)

Prandaj Zoti (me këmbëngulje) do të më presë (me shpresë dhe me mall) për të më dhënë hir, pastaj ai do të lartësohet, sepse pati mëshirë për mua, sepse Zoti është një Perëndi i drejtësisë. I lumtur jam (jam i bekuar, plot fat, për t'u marrë shembull) unë sepse

[me këmbëngulje] kam shpresë tek ai [për fitoren e Tij, për favorin e Tij, dashurinë e Tij, paqen e Tij, gëzimin e Tij dhe për miqësinë e Tij të pakrahasueshme e të pathyeshme]! (ISAIA 30:18)

Zoti nuk do të më lërë bonjak [të pangushëlluar, të braktisur, në zi, të mjerë, pa përkrahje], por do të kthehet te unë. (GJONI 14:18)

Edhe sikur babai im dhe nëna ime të më braktisin, Zoti do të më pranojë [do të më birësojë si fëmijën e Tij]. (PSALMI 27:10)

Krishti banon (qëndron, rri, e bën shtëpinë e tij të përhershme) në zemrën time (tani) për shkak të besimit, dhe unë jam i rrënjosur dhe i themeluar në dashuri.

Unë jam në gjendje të kuptoj me të gjithë shenjtorët [njerëzit e përkushtuar të Perëndisë, përjetimin e asaj dashurie] se cila është gjerësia, gjatësia, thellësia dhe lartësia, dhe ta njoh dashurinë e Krishtit që tejkalon çdo njohuri [pa përjetim], që [në të gjithë qenien time] të mbushem në gjithë plotësinë e Perëndisë [Unë kam masën më të madhe të Pranisë hyjnore dhe jam bërë një trup krejtësisht i mbushur dhe i përmbytur me Vetë Perëndinë]. (EFESIANËVE 3:17-19)

Ashtu siç e ka dashur Jezusin Ati, ashtu edhe Jezusi më do mua; prandaj unë jetoj brenda dashurisë së Tij.

Askush s'ka dashuri më të madhe se kjo [askush nuk ka treguar një ndjenjë kaq të madhe], që dikush të japë [ta dorëzojë] jetën e vet për miqtë e tij (GJONI 15:9, 13) (TLB).

Por Perëndia e tregon dashurinë e tij ndaj meje në atë që, kur unë ende isha mëkatar, Krishti vdiq për mua. (ROMAKËVE 5:8).

Kaq e mahnitshme është mirësia e Perëndisë ndaj meje saqë Ai me anë të gjakut të tij, më ka dhënë faljen e mëkateve sipas pasurisë së hirit të tij – sepse Ai më kupton fare mirë dhe e di mirë se çfarë është më e mira për mua. (EFESIANËVE 1:6)

Edhe sikur malet të zhvendoseshin dhe kodrat të luanin nga vendi, dashuria e Perëndisë nuk do të largohet prej meje, as besëlidhja e paqes nuk do të hiqet, sepse Zoti thotë se ka dhembshuri për mua. (Isaia 54:10)

Besnik (i besueshëm, që e meriton besimin) është Perëndia, nga i cili u thirra në bashkësinë e Birit të Tij Jezu Krishtit, Zotit tim. (1 KORINTASVE 1:9)

Beko, (lavdëro me ndjenjë dhe me hir) shpirti im, Zotin dhe gjithçka që është në mua të bekojë emrin e tij të shenjtë.

Beko, (lavdëro me ndjenjë dhe me hir) shpirti im, Zotin dhe mos harro asnjë nga të mirat e tij.

Ai fal të gjitha paudhësitë e mia [secilën prej tyre] dhe shëron të gjitha sëmundjet e mia [secilën prej tyre], shpengon jetën time nga shkatërrimi dhe më kurorëzon me mirësi e dhembshuri. (PSALMI 103:1-4)

Ai ngop me të mira gojën time dhe më bën të ri si shqiponja.

Zoti vepron me drejtësi dhe mbron çështjen e të shtypurve.

Zoti është i mëshirshëm dhe zemërbutë, i ngadalshëm në zemërim dhe i madh në mirësi.

Sepse sa të lartë janë qiejt mbi tokën, aq e madhe është mirësia e tij ndaj meje.

Sa larg është lindja nga perëndimi, aq shumë ai ka larguar nga mua fajet e mia.

Ashtu si një baba është i mëshirshëm me bijtë e tij, kështu është i mëshirshëm Zoti me mua, sepse unë kam frikë (nderim për Të) prej tij.

Por mirësia e Zotit vazhdon nga përjetësia në përjetësi për ata që kanë frikë prej tij dhe drejtësia e tij për bijtë e bijve. (PSALMI 103:5, 6, 8, 11-13, 17)

Ngaqë kam besim tek Zoti do të rrethohem nga mirësia e tij. (PSALMI 32:10 TLB)

Unë do ta bekoj Zotin në çdo kohë; lavdërimet për të do të jenë gjithnjë në gojën time.

Shpirti im do të krenohet me Zotin; njerëzit e përvulur do ta dëgjojnë dhe do të gëzohen.

Madhështojeni Zotin bashkë me mua dhe të lartësojmë bashkë emrin e tij.

Unë e kërkova Zotin, dhe ai m'u përgjigj dhe më çliroi nga të gjitha tmerret e mia.

Ata (të tjerët) e shikuan atë dhe u ndriçuan, dhe fytyrat e tyre nuk u turpëruan.

..... i klithën dhe Zoti i dëgjoi, e i shpëtoi nga të gjitha fatkeqësitë.

Engjëlli i Zotit zë vend rreth atyre që kanë frikë prej tij dhe i çliron.

E kam provuar dhe e kam parë sa i mirë është Zoti; lum ai njeri që gjën strehë tek ai. (PSALMI 34:1-8,)

Kapitulli 2: E Ardhmja Jote

Të gjitha ditët e të varfrit janë të këqija [nga mendimet e ankthshme dhe parandjenjat], por ngaqë kam një zemër të kënaqur, për mua ka festë përherë [pavarësisht nga rrethanat]. (FJALËT E URTA 15:15)

[Si do të kisha përfunduar] po të mos isha i sigurt se do të shoh mirësinë e Zotit në dheun e të gjallëve! Pres

me ngulm Zotin; jam i fortë, kam zemër; pra, pres me ngulm Zotin. (PSALMI 27:13, 14)

Sepse unë e di se mendimet që ka Zoti për mua janë mendime paqeje dhe jo të së keqes, për të më dhënë një të ardhme dhe një shpresë. (JEREMIA 29:11)

Pse ligështohesh, shpirti im, pse rënkon përbrenda meje? Unë shpresoj te Perëndia, sepse unë do ta kremtoj ende; ai është shpëtimi im dhe Perëndia im. (PSALMI 42:11)

Por shpresa nuk më turpëron, sepse dashuria e Perëndisë është derdhur në zemrën time me anë të Frymës së Shenjtë që më është dhënë. (ROMAKËVE 5:5)

Sepse Zoti Perëndi është diell dhe mburojë; Zoti do të më japë hir dhe lavdi; ai nuk më refuzon asnjë të mirë ngaqë unë eci drejt. (PSALMI 84:11)

Duke qenë i bindur për këtë, se ai që nisi një vepër të mirë në mua, do ta vazhdojë deri në ditën e Jezu Krishtit [deri në kohën e kthimit të Tij] duke e zhvilluar [atë vepër të mirë] dhe duke e çuar në përfundim të plotë brenda meje. (FILIPIANËVE 1:6, KJV)

Sepse jam vepra e tij [bërë nga dora e Perëndisë], e krijuar në Krishtin Jezus [i rilindur] për vepra të mira që Perëndia përgatiti që më parë (i paraplanifikoi), që unë [duke ecur në shtigje që Ai i bëri gati që më parë] të

eci në to [duke jetuar jetën e mirë që Ai rregulloi që më parë dhe e bëri gati për mua]. (EFESIANËVE 2:10)

Ka një kohë të caktuar për çdo gjë dhe për çdo vepër. Prandaj e përul veten nën dorën e fuqishme të Perëndisë që në kohën e duhur Ai të më lartësojë. (PREDIKUESIT 3:17, 1 E PJETRIT 5:6)

Sepse vegimi është për një kohë të caktuar, por në fund Ai do të më flasë dhe nuk do të më gënjejë; nëse vonon, e pres, sepse me siguri do të vijë dhe nuk do të vonojë. (HABAKUKU 2:3, TLB).

Unë kam ngushëllim të fortë sepse kam marrë strehë duke u kapur nga shpresa që m'u vu përpara. Kjo shpresë që unë kam është si një spirancë e sigurt dhe e patundur për shpirtin, e cila hyn deri në brendësinë e velit. (HEBRENJVE 6:18,19)

Unë nuk kam frikë, sepse Perëndia më siguron që të gjitha gjërat bashkëveprojnë [të përgatitura në një plan] për mirë për mua sepse unë e dua Perëndinë, dhe jam thirrur sipas qëllimit të Tij. (ROMAKËVE 8:28).

Perëndia mund të bëjë (dhe mund ta kryejë qëllimin e Tij) jashtë mase më tepër nga sa (unë guxoj të) kërkoj ose të mendoj [pafundësisht përtej lutjeve, dëshirave, mendimeve, shpresave ose ëndrrave të mia më të larta]. (EFESIANËVE 3:20)

Në Jezus Krishtin edhe u zgjodha për trashëgimi (u bëra pjesa e Perëndisë), duke qenë i paracaktuar (i zgjedhur dhe i caktuar që më parë) sipas vendimit të Atij që vepron gjithçka sipas këshillës së vullnetit të Tij. (EFESIANËVE 1:11)

Ky libër i ligjit mos u ndaftë kurrë nga goja ime, por unë do të mendohem për të ditë e natë, duke kërkuar të veproj sipas të gjitha atyre që janë shkruar, sepse atëherë do të kem sukses në veprimet e mia, atëherë do të përparoj. (JOZUEU 1:8)

Fjala është shumë afër meje; është në gojën time dhe në zemrën time. Unë ta zbatoj. (LIGJI I PËRTËRIRË 30:14)

Kështu do të jetë Fjala e Perëndisë, që del nga goja ime; ajo nuk do të kthehet bosh tek Ai [pa dhënë asnjë efekt, e padobishme], pa kryer atë që dëshiron Ai dhe pa realizuar plotësisht atë për të cilën Ai e ka dërguar. (ISAIA 55:11)

Ndaj unë, duke soditur [tek Fjala e Perëndisë] fytyrëzbuluar lavdinë e Zotit si në pasqyrë, jam duke u shndërruar në të njëjtin shëmbëllim nga lavdia në lavdi, si prej Frymës së Zotit. (2 KORINTASVE 3:18)

Unë nuk konformohem me këtë botë (me këtë epokë) [që ka marrë forma nga zakonet e saj sipërfaqësore dhe të jashme], por transformohem (shndërrohem) me anë të ripërtëritjes së [së plotë] të mendjes sime [me anë

të idealeve dhe qëndrimeve të saj të reja], që të provoj cili është i miri, i pëlqyeri dhe i përsosuri vullnet i Perëndisë [për mua]. (ROMAKËVE 12:2)

Misteri i epokave është Krishti që jeton tek unë, shpresa e lavdisë. Ati im qiellor më sheh të mbuluar me lavdi. (KOLOSIANËVE 1:27)

Unë i shërbej një Perëndie I Cili “i thërret” ato gjëra që nuk janë sikur të ishin.

Unë shpall se jam pjesë e një fisi të zgjedhur, priftërie mbretërore, kombi të shenjtë, populli të fituar nga Perëndia, që të shpall lavdinë e Atij, që më thirri nga terri në dritën e tij të mrekullueshme. (ROMAKËVE 4:17, 1 E PJETRIT 2:9)

Ngaqë i përkas Perëndisë, unë pranoj publikisht dhe shpall hapur se jam margaritari i Perëndisë (zotërimi i Tij i jashtëzakonshëm, thesari i Tij i veçantë), dhe se Ai do të më shpëtojë, ashtu siç shpëton një njeri të birin që i shërben. (MALAKIA 3:17)

Si Apostulli Pal, unë nuk e llogaris veten time se e kam kapur (apo e kam realizuar qëllimin), por një gjë po bëj [kjo është aspirata ime]: duke harruar ato që kam lënë pas, dhe duke u zgjatur drejt atyre që kam përpara, po ndjek pas synimin, drejt çmimit [më të lartë dhe qiellor] të thirrjes së lartme të Perëndisë në Krishtin

Jezus. (FILIPIANËVE 3:13, 14)

Unë nuk i kujtoj më gjërat e kaluara, as nuk i shqyrtoj më gjërat e lashta. Ja, Zoti po bën një gjë të re! Ajo do të lëshojë degë; unë e njoh këtë. Po, Zoti do të hapë një rrugë nëpër shkretëtirë, do të bëjë që lumenjtë të rrjedhin në vendet e vetmuara. (ISAIA 43:18,19)

Ngaqë unë i përkas Atij, Zoti i fshin shkeljet e mia dhe nuk do t'i mbajë mend mëkatet e mia. (Isaia 43:25)

Për shkak se shpresoj [pres, kërkoj dhe shikoj] te Zoti fitoj forca të reja, do të ngrihem me krahë [pranë Zotit] si shqiponjat [që ngrihen lart drejt diellit], do vrapoj pa u lodhur dhe do eci pa u drobitur. (ISAIA 40:31)

I armatosur me premtimet e Tij të mrekullueshme dhe planet e Tij të çmuara, e shoh të ardhmen me shpresë dhe besim, i sigurt se atë që më ka premtuar, Ai është plotësisht në gjendje që ta realizojë. (ROMAKËVE 4:21)

Kapitulli 3: Drejtësia Jote në Krishtin

Për hirin tim, Atë që nuk njihnte mëkat, [Perëndia] e bëri mëkat [virtualisht] për mua, që unë të bëhem [të pajisem, të shihem si i drejtë ose shembull] i drejtësisë së Perëndisë në Të [ajo çfarë duhet të jemi, të aprovuar,

të pranuar dhe në një marrëdhënie të drejtë me Të, nëpërmjet mirësisë së Tij]. (2 KORINTASVE 5:21)

Ashtu si emri yt, o Perëndi, kështu lavdërimi im për ty arrin deri në skajet e tokës; dora jote e djathtë është tërë drejtësi. (PSALMI 48:10)

(Perëndia) edhe do të më vërtetojë deri në fund [do të më mbajë të palëkundur, do të më japë forca dhe do të sigurojë shfajësimin; Ai do të jetë garancia ime kundër çdo akuze], që të jem i paqortueshëm në ditën e Zotit tonë Jezu Krisht (Mesias). (1 KORINTASVE 1:8)

Unë jam i lumtur (kjo është gjendja ku fëmija i rilindur i Perëndisë shijon favorin dhe shpëtimin e Tij) që jam i uritur dhe i etur për drejtësi (për një qëndrim të drejtë përpara Perëndisë), sepse unë do të ngopem! (MATEU 5:6)

Unë e hedh mbi Zotin barrën time dhe ai do të më mbajë; ai nuk do të lejojë kurrë që i drejti të lëkundet (të lëvizë nga vendi, të rrëshqasë, të bjerë ose të dështojë) (PSALMI 55:22).

Bibla u shkrua edhe për mua, që të më tregojë se (drejtësia, qëndrimi i pranueshëm para Perëndisë) më llogaritet edhe mua që besoj (mbështetem dhe mbahem) në atë që e ka ringjallur prej së vdekurish Jezusin, Zotin tonë. (ROMAKËVE 4:24)

I drejtësuar (i shfajësuar, i deklaruar i drejtë dhe me një qëndrim të drejtë përpara Perëndisë), pra, prej besimit, unë kam paqe me Perëndinë (paqe pajtimi për t'u mbajtur dhe shijuar), nëpërmjet Jezu Krishtit (Mesias, Të Vajosurit), Zotit tonë. (ROMAKËVE 5:1)

Ngaqë jam i drejtë unë eci në ndershmërinë time; fëmijët e mi do të bekohen (do të jenë të lumtur, plot mbarësi dhe për t'u marrë shembull). (FJALËT E URTA 20:7)

Përshkak se jam i drejtë [në mënyrë të qëndrueshme], shpëtimi im vjen nga Zoti; ai është kështjella ime në kohën e fatkeqësisë. (PSALMI 37:39)

Asnjë armë e sajuar kundër meje nuk do të ketë sukses dhe çdo gjuhë që do të ngrihet e të gjykojë kundër meje do të dështojë. Kjo (paqja, drejtësia, siguria, triumfi mbi kundërshtitë) është trashëgimia ime si shërbëtor i Zotit (ku riprodhohet Shërbëtori ideal i Perëndisë) dhe drejtësia vjen nga Zoti [këtë Ai ma jep si shfajësim]. (ISAIA 54:17)

Ngaqë jam i drejtë (në mënyrë të paepur), sytë e Zotit janë mbi mua dhe veshët e tij janë të vëmendshëm ndaj britmës sime.

Kur unë, i drejti i klith për ndihmë, Zoti më dëgjon dhe më çliron nga të gjitha fatkeqësitë...

Të shumta janë vuajtjet e mia, për shkak se jam i drejtë (në mënyrë të vazhdueshme), por Zoti më çliron nga të gjitha...

Ngaqë jam shërbëtori i Tij, Zoti e shpengon jetën time, unë gjej strehë te Ai dhe nuk do të shkatërrohem. (PSALMI 34:15, 17, 19, 22)

Unë do të vendosem ngultas në drejtësi (në përputhje me vullnetin dhe urdhrin e Perëndisë); do të jem larg nga shtypja, sepse nuk duhet të trembem më, edhe nga tmerri, sepse nuk do të më afrohet më. (ISAIA 54:14)

Për shkak se jam i drejtë në mënyrë të paepur, jam guximtar si një luan. (FJALËT E URTA 28:1) Sepse unë nuk kam një kryepriфт që nuk mund të vuajë bashkë me dobësitë e mia, por Një që u tundua në të gjitha njësoj si ne, por pa mëkat.

Kështu unë i afrohem, pra, me guxim fronit të hirit (fronit të favorit të pamerituar prej meje), që të marr mëshirë e të gjej hir, për të pasur ndihmë në kohën e duhur (për çdo nevojë). (HEBRENJVE 4:15,16)

Tani që jam i drejtësuar (i shfajësuar, i bërë i drejtë, duke hyrë në një marrëdhënie të drejtë me Perëndinë) nëpërmjet gjakut të Krishtit, do të shpëtohem nga zemërimi i Perëndisë. (ROMAKËVE 5:9)

I lumtur (i bekuar, me fat, me mbarësi dhe për t'u

marrë shembull) jam unë, sepse nuk eci sipas këshillës së të pabesëve [nuk ndjek porosinë, planet dhe qëllimet e tyre], nuk ndalem [duke u nënshtruar dhe duke qëndruar joaktiv] në rrugën e mëkatarëve dhe nuk ulem [për t'u çlodhur dhe pushuar] bashkë me tallësit, por gjej kënaqësinë time në ligjin e Zotit dhe mendoj thellë ditë e natë mbi ligjin e tij.

Unë do të jem si një dru i mbjellë [dhe i ruajtur] përgjatë brigjeve të ujit, që jep frytin e vet në stinën e vet dhe që gjethet nuk i fishken; dhe gjithçka do të bëjë do të ketë mbarësi. (PSALMI 1:1-3)

Ky libër i ligjit mos u ndaftë kurrë nga goja ime, por unë do të mendohem për të ditë e natë, duke kërkuar të veprojmë sipas të gjitha atyre që janë shkruar, sepse atëherë do të kem sukses në veprimet e mia, atëherë do të përparoj. (JOZUEU 1:8)

Emri i Zotit është një kala e fortë [mbi të ligun], tek ai turrem [i paepur] dhe mbrohem. (FJALËT E URTA 18:10)

Në ditët e Tij [të Krishtit], unë, i drejti [i paepur], do të lulëzoj dhe kam për të pasur shumë paqe, derisa të mos ketë më hënë. (PSALMI 72:7)

Kjo është besëlidhja që Perëndia ka bërë me mua: Ai m'i ka dhënë ligjet e Tij në zemrën time dhe i ka shkruar në mendjen time (në mendimet e mia më të thella dhe

kuptimin tim më të plotë),

... Dhe nuk do t'i kujtojë më mëkatet e mia dhe paudhësitë e mia.

Por atje ku ka ndjesë (falje dhe anulim të ndëshkimit) të këtyre gjërave (mëkateve dhe shkeljeve të mia), unë nuk kam më nevojë që të bëj ofertë për mëkatin. (HEBRENJVE 10:16-18)

Unë kam përpara një udhë të re (të porsabërë) dhe të gjallë nëpërmjet të cilës unë mund të jem plot me lirinë dhe sigurinë për të hyrë në praninë e Tij “nëpërmjet fuqisë dhe virtytit” që është në gjakun e Tij. (HEBRENJVE 10:19, 20)

Unë mund të hyj me guxim dhe të kem miqësi me Perëndinë për shkak se mëkati im është anuluar, është hequr dhe është harruar.

Sepse atë, që nuk njihte mëkat, e bëri mëkat për mua, që unë të bëhem drejtësia e Perëndisë në Të [ai që unë duhet të jem, i aprovuar, i pranuar dhe në një marrëdhënie të mirë me Të përmes mirësisë së Tij].

(2 KORINTASVE 5:21)

Kapitulli 4: Kapërcimi i Frikës

Sepse Perëndia nuk më ka dhënë frymë frike (frymë

burracake, pa guxim dhe poshtëruese), por [na ka dhënë frymë] force, dashurie dhe mendjekthjelltësie. (2 TIMOTEUT 1:7)

Unë e kërkoja Zotin (u mundova ta gjej, kisha nevojë për Të dhe duke u mbështetur tek autoriteti i Fjalës së Tij), dhe ai m'u përgjigj dhe më çliroi nga të gjitha tmerret e mia. (PSALMI 34:4)

Zemra ime mos u tronditë dhe mos u frikësoftë. [Nuk do të lejoj më që të shqetësohem dhe të kem frikë, as që të trembem, të dyshoj e të jetoj i turbulluar në shpirt]. (GJONI 14:27)

Kur të kem frikë, do të mbështetem te ti.

Me ndihmën e Perëndisë do të kremtoj fjalën e tij; kam vënë besimin tim te Perëndia, nuk do të kem frikë. Çfarë mund të më bëjë njeriu? (PSALMI 56:3,4)

Nuk kam frikë (nuk kam pse të trembem), sepse Zoti është me mua, nuk e humbas, sepse Ai është Perëndia im. Ai më forcon dhe njëkohësisht më ndihmon dhe do të më mbajë me dorën e djathtë (fitimtare) të drejtësisë së Tij. (ISAIA 41:10)

Vetë Perëndia më ka thënë: «**Nuk do të** të lë, as **nuk do të** të braktis. [Në asnjë mënyrë, në asnjë mënyrë, në asnjë mënyrë, nuk do të të lë pa përkrahje, as nuk do

të heq dorë prej teje (nuk do të ta lëshoj dorën kurrë)!
Kurrën e kurrës!]

Kështu unë mund të them, me guxim: «Zoti është ndihmuesi im dhe unë nuk do të kem frikë; [nuk do më mbërthejë paniku, nuk do trembem, as nuk do tmerrohem] ç'do të më bëjë njeriu?» (HEBRENJVE 13:5, 6)

Zoti, Perëndia im, më zë nga dora e djathtë dhe më thotë: “Mos u frikëso, unë të ndihmoj!” (ISAIA 43:13)

Unë nuk kam frikë, sepse Perëndia më siguron që të gjitha gjërat bashkëveprojnë [të përgatitura në një plan] për mirë për mua sepse unë e dua Perëndinë, dhe jam thirrur sipas qëllimit të Tij. (ROMAKËVE 8:28)

Zoti, që më ka krijuar, thotë: «Mos ki frikë, sepse unë të kam shpenguar, të kam thirrur me emër; ti më përket mua. Kur të kalosh përmes ujërave, unë do të jem me ty, ose kur të kalosh lumenjtë, nuk do të të mbytin; kur të ecësh nëpër zjarr, nuk do të digjesh dhe flaka nuk do të të përpijë. Sepse unë jam Zoti, Perëndia yt, i Shenjti i Izraelit, Shpëtimtari yt. (ISAIA 43:1-3)

Nuk do të kem frikë, sepse frika ka të bëjë me ndëshkimin ose torturën.

Unë kam lirinë (guximin dhe sigurinë) dhe hyrjen te Perëndia (një afrim të parezervuar për tek Zoti plot çlirim dhe pa frikë).

Për këtë arsye, nuk do të ligështohem [nuk do të humbas toruan e as nuk do të brengosem nga frika].

(1 E GJONIT 4:18, EFESIANËVE 3:12,13)

Perëndia është për mua një strehë dhe një forcë [e fuqishme dhe e padepërtueshme ndaj tundimit], një ndihmë gjithnjë e gatshme në fatkeqësi.

Prandaj unë nuk do të kem frikë edhe sikur toka të luajë dhe malet të hidhen në mes të detit. (PSALMI 46:1, 2)

Do jem i fortë dhe trim; nuk do të kem frikë dhe nuk do të thyhem, sepse Zoti, Perëndia im, është me mua kudo që të shkoj. (JOZUEU 1:9)

Unë nuk do të kem frikë; syri i Zotit do të jetë mbi mua gjatë gjithë kohërave sepse unë e kam frikë (e respektoj dhe e adhuroj i mahnitur pas Tij), sepse e pres Atë dhe kam shpresë në mëshirën dhe mirësinë e Tij. (PSALMI 33:18).

Unë nuk shqetësohem për të nesërmen, sepse e nesërmja do të shqetësohet vetë për vete. Secilës ditë i mjafton e keqja e vet. (MATEU 6:34)

Unë nuk kam frikë, sepse nuk do të ngatërrohem; nuk kam turp, sepse nuk do të skuqem; do të harroj madje turpin e rinisë sime dhe nuk do ta kujtoj më çnderimin e vejërisë sime. Sepse krijuesi im është “dhëndri” im; emri i tij është Zoti i ushtrive; Shpengimtari im është i Shenjti

i Izraelit, i quajtur Perëndi i tërë tokës. (ISAIA 54:4)

Kur tundohem që të humbas zemrën, i them vetes: «Bëhu i fortë, mos ki frikë!». Ja, Perëndia im do të vijë me hakmarrjen dhe me shpërblimin e Perëndisë; do të vijë Ai vetë për të më shpëtuar. (ISAIA 35:4)

Nuk kam frikë sepse Perëndia më ka dhënë një thesar të çmuar nga lavdia e Tij për të fuqizuar dhe përforcuar njeriun tim të brendshëm, që forca dhe fuqia e Tij të mund të më mbushë dhe që të mos mposhtem nga tundimi për t'iu dorëzuar frikës. (EFESIANËVE 3:16)

Unë do të lavdëroj Zotin dhe do të ngre lart emrin e Tij sepse i thirra dhe Ai m'u përgjigj! Ai më çliroi nga të gjitha frikërat e mia. (PSALMI 34:4)

Unë nuk kam frikë sepse në dashuri nuk ka frikë [nuk ekziston tmerri], madje dashuria e përsosur (e plotë dhe e rritur tërësisht) e nxjerr jashtë frikën, sepse frika ka të bëjë me ndëshkimin dhe ai, që ka frikë nuk është i përsosur në dashurinë [nuk është rritur akoma në përsosmërinë e plotë të dashurisë]. (1 E GJONIT 4:18)

Zoti është drita ime dhe shpëtimi im; nga kush do të kem frikë? Zoti është kështjella e jetës sime; nga kush do të kem frikë? Kur njerëzit e këqij, armiqtë dhe kundërshtarët e mi më sulmuan për të ngrënë mishin tim, ata vetë u lëkundën dhe ranë. Edhe sikur një ushtri

të dilte kundër meje, zemra ime nuk do të kishte frikë; edhe sikur një luftë të pëlçiste kundër meje, edhe atëherë do të kisha besim. Kur vijnë telashet, Perëndia do të më fshehë. Ai do të më vendosë në një shkëmb të lartë, larg prej të gjithë armiqve të tij. Më pas, unë do t'i sjell Zotit sakrifica dhe do ta lavdëroj atë me këngë të mbushura plot gëzim. (PSALMI 27:1-3, 5, 6)

Nuk do të kem frikë, sepse që ditën e parë që vendosa në zemrën time të kuptoja dhe të përulesha para Perëndisë tim, fjalët e mia u dëgjuan dhe Zoti dërgoi një engjëll si përgjigje [dhe si rrjedhojë] e fjalëve të mia. (DANIELI 10:12)

Dhe, kur do të më çojnë përpara ... parisë dhe autoriteteve ... nuk do të shqetësohem sesi ose se çfarë do të them për t'u mbrojtur, ose për çfarë do të më duhet të them, sepse Fryma e Shenjtë në atë orë do të më mësojë se ç'duhet të them. (LUKA 12:11, 12)

Zoti është bariu im, asgjë nuk do të më mungojë.

Ai më çon në kullota me bar të njomë, më prin tek ujërat e qeta.

Ai ma përtërin shpirtin, më prin nëpër shtigjet e drejtësisë, për hir të emrit të tij.

Edhe sikur të eci në luginën e hijes së vdekjes, nuk do të kem frikë nga asnjë e keqe, sepse ti je me mua;

shkopi yt dhe kërraba jote janë ato që më japin zemër.

Ti shtron para meje tryezën në prani të armiqve të mi;
ti vajos kokën time me vaj; kupa ime po kapërderdhet.

Me siguri pasuri dhe mirësi do të më shoqërojnë
në gjithë ditët e jetës sime; dhe unë do të banoj në
Shtëpinë e Zotit ditë të gjata.

(PSALMI 23:1-6)

Përfundim: Qëndroj i Patundur

Unë qëndroj, pra, në lirinë, me të cilën Krishti më
liroi, dhe nuk hyj përsëri nën zgjedhën e skllavërisë.
(GALATASVE 5:1)

Nuk e hedh tej guximin tim, që ka një shpërblim të
madh.

Sepse kam nevojë për durim që, mbasi të bëj
vullnetin e Perëndisë, të marr gjërat e premtuara.
(HEBRENJVE 10:35, 36)

RRETH AUTORES



JOYCE MEYER është një nga mësueset kryesore praktike të Biblës në botë. Si autorja Nr.1 më e shitur e gazetës *New York Times* ajo ka shkruar më shumë se tetëdhjetë libra frymëzues, përfshirë këtu *Kurrë Mos u Dorëzo*, *Sekreti i Kënaqësisë së Vërtetë*, *100 Mënyra për të Thjeshtëzuar Jetën Tënde*, gjithë grupin e librave *Fushëbeteja e Mendjes*, si dhe nismën e saj në gjininë e romanit me titullin *Qindarka dhe Çdo Minutë*, dhe shumë të tjerë. Ajo gjithashtu ka transmetuar mijëra mësimë audio, dhe ka tashmë një bibliotekë të plotë në video. Programet radio-televizive të Joyce Meyer, *Të Shijosh Jetën e Përditshme*® transmetohen në mbarë botën, ndërkohë që ajo udhëton shumë për të mbajtur konferenca. Mesazhet e saj, ju mund t'i ndiqni në disa gjuhë të ndryshme në **tv.joycemeyer.org**. Joyce dhe bashkëshorti i saj, Dave, janë prindërit e katër fëmijëve të rritur dhe banojnë në St. Louis, Missouri.

Lutja e Shpëtimit

Zoti të do dhe Ai dëshiron që të ketë një marrëdhënie personale me ty! Nëse ende nuk e ke pranuar Jezus Krishtin si shpëtimtarin tënd, mund ta bësh në këtë moment! Thjesht hapja zemrën tënde atij dhe thuaj këtë lutje:

“Atë, e di që kam mëkatuar ndaj Teje. Të lutem më fal. Më bëj të pastër. Unë të premtoj se do t’i besoj Jezusit, Birit Tënd. Unë besoj se Ai vdiq për mua. Ai mori mëkatin tim mbi vete, kur Ai vdiq në kryq. Unë besoj se ai është ringjallur prej të vdekurve. Unë ja dorëzoj jetën time Jezusit , në këtë moment.

Faleminderit Atë, për dhuratën tënde të faljes dhe të jetës së përjetshme. Të lutem, më ndihmo të jetoj për Ty! Në emër të Jezusit, Amen!”

Nëse ti lutesh me vërtetësi në zemrën tënde, Zoti të ka dëgjuar, të ka pastruar dhe të ka çliruar nga skllavëria e vdekjes shpirtërore. Merr një kohë për ti lexuar dhe studiuar këto vargje dhe kërkoji Zotit që të të flasë, ndërkohë që ti ecën me Të, përmes këtij udhëtimi të jetës tënde të re.

Gjoni 3:161

Efesianët 1:4

1 Gjoni 1:9

1 Gjoni 5:1

Korintasit 15:3-4

Efesianët 2:8-9

1 Gjoni 4:14-15

1 Gjoni 5:12-13

Lutju Atij dhe kërkoji të të drejtojë në një kishë, e cila bazohet fort mbi biblën. Kështu, ti do të kesh mundësinë që të rritesh në marrëdhënien tënde personale me Jezus Krishtin. Zoti është gjithmonë me ty. Ai do të drejtojë ty ditë pas dite dhe do të tregojë sesi të jetosh jetën plot bollëk, që Ai ka rezervuar për ty.

**PËR TË KONTAKTUAR ME AUTOREN
SHKRUANI TEK:**

Shërbesa Joyce Meyer, Shqipëri
c/o AEP Box 50, KP 119
Tiranë
ose telefononi: 0692055966

Ju lutemi, kur të shkruani, përfshini dëshminë tuaj
ose ndihmën që keni marrë prej këtij libri. Kërkesat
tuaja të lutjes janë të mirëpritura.

Në SHBA, ju lutem shkruani:
Joyce Meyer Ministries
P.O.Box 655
Fenton, MO 63026
USA
(636) 349- 0303
www.joycemeyer.org

Në Kanada, ju lutem shkruani:
Joyce Meyer Ministries— Canada
Lambeth Box 1300
London, ON N6P 1T5
CANADA
1- 800- 727- 9673

Në Australi, ju lutem shkruani:
Joyce Meyer Ministries— Australia
Locked Bag 77
Mansfield Delivery Centre
Queensland 4122
AUSTRALIA
(07) 3349 1200

Në Angli, ju lutem shkruani:
Joyce Meyer Ministries— England
P.O. Box 1549
Windsor SL4 1GT
UNITED KINGDOM
01753 831102

Në Afrikën e Jugut, ju lutem shkruani:
Joyce Meyer Ministries— South Africa
P.O. Box 5
Cape Town 8000
SOUTH AFRICA
(27) 21- 701- 1056

LIBRA NGA
JOYCE MEYER NË SHQIP

Fushëbeteja e Mendjes

Kur, o Zot, Kur?

Një Mënyrë e Re Jetese

Paqe

Pse, o Zot, Pse?

Revolucioni i Dashurisë

*Shërim për Zemrat e Thyera**

Thuaji Se i Dua

Perëndia Kërkon të të Shpëtojë!



Perëndia të do dhe ka një plan të mrekullueshëm e të lavdishëm për jetën tënde. Por ndonjëherë mund të jetë e vështirë që të besohet se Ai ka përgatitur një fat specifik për ty. Në qoftë se je lënduar nga e kaluara ose në rast se ndjehesh i pavlerë, mund ta kesh të vështirë që ta pranosh dashurinë e pakushtëzuar të Perëndisë. Perëndia dëshiron që të të arrijë sot aty ku je. Mbahu tek shpresa... ky libër ka një përgjigje për ty.

Në këto faqe, Xhois Majer (Joyce Meyer) na zbulon se si mund ta ndryshojmë imazhin që kemi për vetveten, në atë që Perëndia sheh. Kur ti ta besosh atë që Perëndia thotë për ty, e tashmja dhe e ardhmja jote do të shndërrohen në mënyrë të mrekullueshme për të pasqyruar planin hyjnor të Perëndisë. Ti do të mësosh si të triumfosh mbi frikën dhe si të kesh paqen e mendjes që vjen kur ia beson Perëndisë të ardhmen tënde.

Le të veprojmë që sot brenda teje Fjala e Perëndisë. Fillo që tani që ta lejosh dashurinë e jashtëzakonshme të Perëndisë të të prekë dhe të ta shërojë zemrën e lënduar!